

佚存叢書

增4  
569  
33





門 1 4  
號  
卷

木村桑甫君  
贈此書以為  
其先考紀念  
維時明治三  
十九年九月  
朝書圖章



景文宋公集卷第八十一

原本卷首  
第一頁佚

表

代鄆州王資政謝上表

臣某言奉違帝幄甫蒞价蕃切三輔以聯圻長萬夫  
而督政感隨戀結榮與愧并中謝切念臣本以中材  
弗期膺仕先帝拔之凡庸飭以榮寵赦夫用拙之艱  
許其效智之實與聞國論參服臣鄰自爾叨食浸浮  
沾恩逾厚越逢下武丕荷慶基垂念舊人之庸俾行  
丞相之事時惟物載謙有未遑介于兩宮政亦多故  
而臣荷知人於真聖念在耳之緒言冀蹈朴忠歸報



明辟執據典刑之重傳會幾微之宜一心事君朝廷  
尤悉千慮期得夙夜所強寧無媒孽之乘果從災異  
之免六更年籥三易守符嚮沐召歸再加拉拭始由  
樞省俄正台司臣亦知遺簪蒙顧之餘鳴雞失旦之  
後方且擇典之令保節之甘慎獨閑邪誠明遠悔壓  
棖虞棟幹之撓折足畏鼎飪之羞漸冀協恭□□同  
底其如窮陰難忱槁質易衰病日眩於臨文蹇步疲  
於拱著三吏者彌綸庶采外朝者景式辟工苟容具  
臣焉謂彼相輒啟還於魁柄謀退保於餘年危惘上  
聞費辭貽瀆敢謂尊號皇帝陛下納之大度惠以有

終延聰聽於蓋高塞煩言之先入時推麗澤用獎告  
勞升冠揆階崇兼禁職擇濟潔之津奧距齊魯之富  
壤垂許典州漸令佚老前瞻天邑無勤象闕之思右  
睨鄉疇易及角巾之計曲成至此大造難酬伏况狂  
測屢空稼茨其稔室盈杼軸無乏於二東吏勸農桑  
明宣於一札願寬旰爪冀力循良邇邇綴以方遙在  
孤情而奚極臣無任

生日謝生餼表

臣某言門弧蓬筓私誌於始生牢餼坊尊旅霑於蕃  
錫感親懷之不逮媿君貺以無從登受以還腆榮罔



真中謝切念臣代惟羈齒才本拘儒乏于內之美猷  
與惟幾之祕筦幽而當黜日傲於攸箴求不爲瑕上  
麻於大度然而拙牽其分志奪於衰始蒙晏晏之風  
寢介庸庸之福何圖暮齒彌示矜憐因震夙之有初  
憫劬勞之永謝特頒多物俯續頽齡鍾庾陳庭曾饗  
嗣道回望秋之蒲質更使欣榮駐仄日之缶歌仍資  
宴喜斯蓋尊號皇帝陛下懋敦邦憲欽待臣鄰因舊  
體之則然諒孤生之曷稱撫躬銜遇縻踵爲酬臣無  
任

讓恩表

臣某言欽柴已事湛露函禧叨與祕樞均推渥典席  
恩徽之累下捫心極之有涯敢援吶辭啟停蕃錫中  
謝切念臣久塵幾緯無補顯猷仰就德以日躋馨小  
心而昭事愴宗秩禮震動殊休慙款先禘而遂見闕  
宮哀對上靈而升侑文考光華接於旦暮汪濊塞乎  
天淵內慙衰殘法當侍從瞻如進揖寧善於魯儀肅  
若動心但欽於漢瑞獲紆不敏之咎已銜大庇之仁  
敢冀睿明首褻機管錫之崇號訓以懋功進三品之  
美階加八柱之榮數靜言匪服祇足增慙且夫禮行  
於郊孰非展采勲在于策斯可勒歸苟曰罔功率爲



不稱矧當三接之地尤寄百度之宜寵旣自叨勸將  
何有伏望尊號皇帝陛下矜立志之難奪靡問於匹  
夫察過令而必收罔論於渙汗焉還虛投庸息羣言  
叩善聽之彌高露危情而借極期于從欲是免濫官  
臣無任

代進新稻雙竹詩表

右臣等伏以層城仙籙順動於王游區稻町篁紛函  
於天施仰趨中召與覲嘉生奉衢飲以屬厭激蓬心  
而感發恭惟皇帝陛下勤勞訓道間豫疑神聯漢氏  
之離宮有周家之靈囿特侔滂浸臨藉香秬務知五

稼之艱式扈九農之勸箭筠其茂雖苑所珍強籜繁  
敷秀莖歧出本至仁之普汜萃靈物以鋪葵警蹕紆  
行臣隣拭目樂崇邱之允殖藹折俎以均歡內荷帝  
慈竊推天意一禾實穎準歲取之且千衆節其苞示  
世支之維百臣等共慙禱昧適邁亨嘉敢抒費詞少  
陳上德慶千齡之累盛維以遂歌慙五降之容彈安  
能中雅方塵睟覽交集覲顏臣等謹夙夜齋沐各裸  
成親稼殿新稻儀鳳閣雙竹詩二章干冒宸嚴臣等  
無任省循狂斐慙懼屏營之至其詩謹繕寫隨狀上  
進以聞



謝恩表

臣言昨以邁勤歸之慶膺序進之褒尋述讓封亟煩  
敦詔蒙心慮於再瀆君貺難乎重違拜受以還榮悖  
參極中謝切念臣學纔半古智不兼人參筦斗樞嚮  
周閏籥仰丁至治丕適舊章恭抃嘉壇哀侑上帝美  
祥來答繼日月而可書渙號遂行塞天淵而交抃惟  
茲卹祀之重實與相儀之行早苦病衰僅逃跛倚猥  
緣近侍亦寘賞科慮塵不僭之猷輒罄自知之訊冀  
還渥縟少息震惶而善聽既高危心終隔固執其介  
則違聞命之恭寧忝其榮以圖保往之報然念茂功

匪建美號前加品章表於魏階勲柱隆乎楚級茲爲  
徽數曷允師言此蓋中謝尊號皇帝陛下能哲有初  
推仁無貳獎纖塵之益以勸事君法景風之來速其  
行惠俾夫無狀叨厥懋官誓斷斷於公心答恢恢之  
私覆無任

代謝進五箴獎諭表

臣某言伏蒙聖慈以臣所進金華五箴并序特賜詔  
書獎譽者瞽言通諷竊抒於危衷善聽作謀猥煩於  
褒答荷擇焉於乃聖赦斐然之所裁訓獎垂頒榮悖  
參處中謝伏念臣稟生蒙昧典學迂踈亨會相偕仕



途寢撫早緣佔畢之伎久侍擁經之游天縱睿姿日  
濟茂德大山盤鞏無俟埃盞之增時雨沛流安施浸  
灌之力委蛇就綴拱默窮年瑁瑁者佩璫之長尸官  
自審坎坎者河檀之伐浮祿既多因輟講以偃休偶  
臨文而采獲以爲千慮而得罔罔至愚百官攸箴趨  
無闕政堯仁率俾有謗木之求周道其興存庭燎之  
戒由是旁緣前誼紬繹費辭宣之使言本由善治之  
及入告于內終謝斯猷之宜敢謂尊號皇帝陛下綜  
成務之閑察邇言之陋貸夫淺慮諒乃朴忠收爲瑱  
之寸長乃均犀璧枉出緡之慈諭迴比日星刻誦載

周孤危知免誓雖從於九殞靡忘補於萬分

代張屯田兗州謝上表

臣某言昨蒙恩差臣知兗州軍事兼管內勸農事卽  
於某月某日到任訖初違左城出領東藩千里而遙  
萬夫爲長卽宣寬詔用慰斯民臣某中謝竊念臣門  
素地寒器朽識褊陶師儒而有漸苦捍格以無成逮  
事先朝已參著定親逢下武繼被采收有皆短之五  
能乏至愚之一得涖官未效滿歲輒遷比濫使輶獲  
提京邑式瞻周道慶在隰之有華祗率漢條期墾田  
之可問雖希盡瘁寧厭用多合首次沙用懲竊祿詎



謂尊號皇帝陛下葦然善養豁爾兼容山有疾以務  
藏目容光而必照黜幽未寘疏渥更優頒禮上臺假  
麾廣魯伏况量衡所協近經虞后之巡壤賦有差悉  
載夏家之貢禪闕在望儒泗成風家被復除人知廉  
愧謹當奉揚成訓昭體至仁舉燭解琴冀動咨於典  
訓握苗傷錦敢徼罪於官刑論髓在茲析肝何喻

代石少傅謝恩澤表

臣某言伏蒙聖慈特授臣姪孫某某官者聖澤下頒  
詔綸有煥慶叢闡闡光動里閭中謝伏念臣退迹煢  
煢餘年種種尙叨儲傅之秩許懷家巷之安養且有

仁德將焉謝近緣誕聖之節更陳延賞之求伏蒙尊  
號皇帝陛下大度包荒至慈及物甫從人欲卽霈臺  
恩孝治方隆許及宗親之末衰容無狀更流枝葉之  
榮揣分旣逾糜軀曷報

代人陳情表

臣某言聞父之於子天性也親才而下無能君之於  
臣善養也進賢而黜不肖蓋智昧於物必間乎有室  
之言矧位浮於人曷追乎爲邦之典所宜知退敢用  
敷言竊念臣先故蕩微謀猷局隘神宗之啟英毅早  
玷采收眞聖之御寶圖繼膺進拔與聞外廷之議供



奉層禁之中申侯之取不疵本緣君愛隨何之儒既  
腐寧濟事功會新廟之願成啟長君之善繼伏遇尊  
號皇太后陛下寵綏大業慈護羣元參日慎之繁機  
迓天平之至治俯矜無狀之吏是爲最舊之臣不忍  
遐遺更加進越勸華光之講每踐禁規非倚相之能  
曷裨玉度居多三陌以自勉庶幾一得而上酬其如  
槁質早衰窮年多病舊痾每作請告移旬賴天造之  
好生俾爾齡於未泯罔許乞其骸骨姑復峻其寵章  
拱著寢隆害盈可畏而臣逮茲歲晏愈覺體虺鬢髮  
彫殘齒牙缺墮每書笏進對則物物忘遺或聞雞夙

興則岑岑昏眩膝搖多痺日暈有花習靜有若於尸  
居強飯不知其肉味常慮先犬馬之一旦玷鴛鴦之  
多儀孤繡展之詳延煩霜毫之抨劾儻不知止人其  
謂何重念臣家本力農世居汶上先疇咸在編房未  
移自束帶立朝去里之情彌結且小人懷土樂生之  
願茲深迫此桑榆之期願諧符竹之請先朝成例故  
府可求伏望皇太后陛下推憐怛之至慈憫幽憂之  
舊物謂少盡其力則藉彼驅馳及老無能爲則終之  
收恤特垂開可俾即便安然後治將蕪之田爲有歸  
之地勉茲殘喘奉乃化條嵇康之積損成衰儻諧養



療漢人之不死而活敢忘糜捐罄漚由衷仰希得請  
臣聞物勝於權則衡爲之殆馬竭其力則御速於顛  
蓋以器循量而易施材過求而難勉是以功名之際  
惟髦士可居強力之容匪暮年勝任將傾危懇敢援  
斯言竊念臣本以邱樊託于經術幸逢先烈超備從  
官服上教之彌文因至愚而取信出入扇禁無所建  
明履歷藩宣茂聞條教尊號皇太后陛下尊號皇帝  
陛下奉承謨訓過聽空疎簡服在庭兼容如地雖百  
度之治咸使與聞每萬機之餘常參勸講七周成歲

訖乏寸長惟君知臣足以驗其無用惟國有典不可  
追於黜幽且臣自知甚明內省尤熟以一介之鄙賤  
丁千載之會昌邑戶餐錢非祿之不厚高冠大佩非  
位之不崇同僚皆賢非志之不合處奏多可非言之  
不從固當勉服攸箴謹修爾職答乃聖之眷遇爲斯  
文之寵光其如犬馬齒衰桑榆景薄中年則病奪其  
壯晚節則務傷於神辨色立朝足居多於跛倚書思  
記命日不辨於馬烏而臣頃自去秋願辭近職上恩  
不聽寵渥就加逮黽俛以近茲且憊昏而益甚事皆  
忘誤疾愈疋癘顧四體之已疲宜一辭而後止重念



景文公集 九  
臣之鄉籍世占鄆州既託枌榆薄營產利不勝首邱之志願諧符竹之行庶及餘年聊蘇疲瘵况前朝邢曷本貫曹州亦自禁廬得臨鄉部臣今所請似有前規伏望陛下念舊物之不可遺憫孤生之老且至特垂寬詔俾守先廬諒亦大君進退之間微臣止足之分萬無纖介可貽累於至仁一切便宜尙力思於卧治仰干輿鑒伏俟嚴誅

伏陳州章相公乞致仕第一表

臣聞器有所極強之者必顛志有所安違之者將敗是故智士不窮量以邀受仁君無拂願以責功內顧

危悚敢援茲喻伏念臣姿力駑下術略迂疎蒙幸中人之才待罪宰相之府寵與時進負隨日深謀謨弗良彫紊相踵羌夏有未纓之醜關陝多無聊之人舊盜跳梁篁酋煽結杼軸罄於編戶杆皮蠹於遠方上貽焦勞外謹謗誚咎不臣執罪將孰歸比者荐瀝肝膺願乞骸骨冀蒙不識之竄以贖安用之辜陛下包納荒瑕親喻戒飭頒訖郊邱之享乃許印綬之還褒亮所加諄慈兼至臣此時外迫大誼中忘至愚敢優游以自安輒惶恐而視事然而智慮淺局年鬢頽侵短臂屈長袖之前疲足困新羈之左覩然尸位倏又



彌年所賴陛下以百姓爲心天下爲度捨末爭而納  
戎帳之款捐滯積以撫遼衽之和克展上儀遂布鴻  
度永惟橫目之庶方就覆盂之安臣之及茲可謂天  
幸過此不止其如罪何雖大度之見容任輿議之難  
遏抑又聞當退而進者悔必及宜黜而用者傷必多  
高位乃身殃之媒厚祿爲衆怨之舍借令臣冒厥明  
戒苟留上司玷廊廟之儀形被史家之貶戮死有餘  
咎仁弗忍爲伏望察如丹之誠憐指景之暮遂容納  
政早獲省私亦不必窮喋喋之言乃垂開可惜齷齪  
之謹妨用俊良虔冀曰兪誓無但已

代石少傅賀南郊禮畢表

臣伏觀今月二十五日南郊禮畢者國祀告竣天行  
飲至慶騰方夏歡浹綏紳竊惟恤祀以誠有國之大  
節饗帝爲報唯聖之上儀矧三歲以躬行合百神而  
並職本朝所重縟典攸先恭惟陛下誕受葆圖丕承  
前憲躬自儉薄政實焦勞百穀已登坐躋仁壽之俗  
五兵雖用常戒忿鷙之師是以列緯澄霄尤祥駢牒  
用懷景貺乃講鴻儀申敕庶官駿奔百執款殊庭之  
祕奧觀清廟之邃嚴遂及郊邱祇奉圭幣儀必及物  
史皆信辭樂六變以咸和合祛乎天地禮三獻而不



忘哀對乎祖宗熙事備成至靈歆感逮彫輿之旋軫  
坐堯闕以推恩澤與雲翔俾羣元之更始命先郵速  
包無外以相歡昭洗故疵導迎新祉臣幸還所事繼  
屬繇痾留滯一纏空羨落鳧之遙羽蹢躅三陌但同  
陽藿之傾心引領私門注情神闥

景文宋公集卷第八十一  
臣伏觀七月五日御禮以今年十一月十七日有事  
於南郊者協華之盛茂擁於神祺拜祝之行親紆於  
詔蹕姑戒嚴而措事先誕告以揚庭發號崇朝均驩  
有截臣伏惟陛下嗣聲遙駿覃化淵泉躬夏后之勤  
邦體商家之恤祀會先玉帛之至樂包天地之和紺  
席圓壇講令芳於百物寒門治谷交盼蠻於萬靈善  
制允諧先庚惟謹極承平之巨麗究卓越之盛容願

景文宋公集卷第八十一

表狀

代南郊乞姪男恩澤表

臣伏觀七月五日御禮以今年十一月十七日有事  
於南郊者協華之盛茂擁於神祺拜祝之行親紆於  
詔蹕姑戒嚴而措事先誕告以揚庭發號崇朝均驩  
有截臣伏惟陛下嗣聲遙駿覃化淵泉躬夏后之勤  
邦體商家之恤祀會先玉帛之至樂包天地之和紺  
席圓壇講令芳於百物寒門治谷交盼蠻於萬靈善  
制允諧先庚惟謹極承平之巨麗究卓越之盛容願



景文公集 卷八十一  
艷飲和肖翹企澤而臣濫名郎舍繫籍京臺延望玉  
關之門阻從甘泉之簿尙傾危欵仰託至仁切念臣  
有親姪某早習義方粗親章句有年及室無祿代耕  
而臣終鮮銜悲亢宗靡託惜其孤苦勵以進修不勝  
猶子之情願遂起家之志庶及禮成之日許推世及  
之恩伏望陛下憫臣以服事四朝哀臣以年踰七十  
獨茲童孺久漏恩私儻參一命之餘俾紹闔門之慶  
則臣少盡其力知有報於弊帷死且猶生誓無忘於  
結草

代謝加恩表

八十一

臣昨以虔貢露封讓還渥典叨辭雖達善聽靡回煩  
深詔以爲言俾斷章而趣受拒恩難瀆拜賜奚勝切  
念臣稟質至愚逢辰最舊久參宰政訖乏寸長嚮屬  
三歲常郊萬靈介祉翼翼文考推以配天實實闕庭  
盈而並薦得陪顯相協歲上儀居謝徐生之容無裨  
伯始之問何言飲至亦與疇勞內積冒居之慙慮開  
缺望之隙丐收茂渙用穆爨經而遴布俞音慎行出  
令廢其悃幅敢以寵靈表雲臺之美名賁巖廊之要  
望階章魏品之峻勳柱楚官之華參萃于斯爲榮尤  
至得非寧賞而僭在邦體之則然匪汝爲疵恃君養



而無恐輒膺敷錫增激懦衷此蓋陛下斂待臣鄰懋明憲度祿以爲砥冀磨鈍於人賜不踰時示勸能於後遂令繇薄首被慶私惟百慮以勉修期萬分之稱報

代生日謝賜羊酒米麵等表

禮本自生劬勞之常感寵加多物錫予之至慈荷君所之頒分動私門之距躍切念臣系承單素仕邁亨嘉緣朴移忠因儒懦武進貳惟幾之地間聞甚衆之言舛命自嬰親闈見背亟蒙勉詔還攝攸司楚臣離散之魂胡能立事漢后回容之庇居不爲瑕屬震肅

之初辰動沈緜之深嘆陔蘭隕露遂無欲報之期門矢生塵長結已孤之想敢謂陛下俯矜餘息申獎有家雖當惕景之餘亦侈陳庭之賜仰緣滋旨更極摧號收景西山還齡司命不家而食頓荷於扶衰有踵可磨敢忘於陳力苦言增訥感膈奚宣

代陳情乞尋醫表

臣聞周家作誥首誠於癯官漢氏著儀許從於移病蓋大君寬疾之念推至仁善養之風三最有聞乃嘉其與告千石共治詎可以尸居迫此疋殘所宜引避臣切念臣材姿么謏系代羈單乏典樂以名家濫諸



生而充賦親逢乙覽遂中丙科屬家難之繼鍾逮龍  
躔之十改一命尉平南部載調掾於北軍當三輔浩  
穰之間森乎條教會萬乘齋居之隙多所平反棘署  
尸丞芝函僭賞升佐鳳岐之郡政俄假叩蜀之使符  
舉畏亂繩坐虞傷錦伏值陛下丕承在旦渙號均禧  
擢於六尚之班隸乃一王之局孰何貸責寢含如地  
之容極陋揆能終費坎壇之刺庇于大度及此再麾  
當江漢之方思得土風之樂甚修方有序論報無階  
而臣屬自去秋浸嬰末疾卧閣相繼握臂鮮棕髮從  
白而得衰目視朱而成碧步趨興齊跛之謂沈痼均

漳竄之嗟乃至束帶愆儀班春闕政事委丞掾之決  
食失匕筋之滋每廢忘於臨文專幽憂而玩日曠僚  
已甚竊祿何顏誠以臣荷寵至深謝生無所身非稱  
服自速子臧之災少不如人矧迫田光之老豈可枿  
枯株之藁質叨細札之長人竊飽於太倉之糧據貴  
於東方之騎汲黯之病甫力卧治莫能楚客之魂久  
迷些招徒爾輒圖藏密以便養痾欲乞聖慈特聽解  
所居官許令尋訪醫治伏望陛下曲成在念慘愛疑  
懷俾得謝於中年且博詢於高手益調名劑丐承餘  
齡仰恃生符苟焄蒿之未泯誓於死節罄精力而仰



酬係戀無階震惶惟極

代乞自試表

臣聞能銘能賦古可爲於大夫自銜自媒士或譏於醜行然則被彌文之化咸欲露其中蘇赦大言之尤姑議程乎豪俊敢泐茲誼俯導微衷切念臣代系單平藝能空闔曩由鄉品上與計偕親逢正守之明覆實攸司之奏擢於寒日列在秀科禮局補郎方州從辟未操使割舉迷從政之方不稽而禾坐費代耕之廩在寬闡教惟疾是藏幸紓萬坐之刑入會三年之課斷溝枯木宜絕齒於犧罇荒菜槁苗豈望成於嘉

穀然臣自幼承樂逮長從師久剽緒風罔遷異物自恪勤於簿領頗廢忘於緹緗至於洸汰舊疑踐循雅俗足曲歌轅之末細辭呻畢之餘時著于篇未能自默譬之采綠且無襜躬之盈均乃鳴蛙奚助官私之地伏遇陛下順稽古制駿惠先猷溢衡石以程書交公車而受奏稗家九百實俟從容之求書錄千餘追復文章之盛鴻徽所鑠綿宇嚮風矧惟孤臣久陶土教宜倡先於南闕答厚養於中阿切用連章具存別錄表求自試敢邀過聽之私人不廢言或埃聖謀之擇輕塵皇覽悅集深憂



代轉戶侍充職知廬州謝表

臣伏奉制命特授臣戶部侍郎充龍圖閣學士知廬州軍事兼管內勸農使者寵加無狀願出所崖渙汗不收捫心增腆竊念臣憊煩材品捍格藝文早汗署堂繼持從橐慶親逢之在且託私蓋以如天旣負又乘宜疏而稗書思朝簿絕紀於半勞計過夜分未知其寡悔且復稟生多病中年蚤衰目若眊昏氣多輜結悒悒臂肉計日減分種種頭毛從衰得白或卧廬請告或伏枕彌旬亟昧死以陳章願出藩而寬疾洪惟慘變終爾倚違如臣至愚自卜已審非不知高門

之地邇帝所之凝嚴承明之廬爲仕途之極摯而命奇智困福過災生跛倚不足以相儀忘誤無容而置對起訖還卧自取晉臣之噓否終弗傾誰任羲爻之咎罔虞三瀆頻紊四聰祈天必從誓死不朽豈謂伏蒙陛下深仁念舊大度匿瑕收電霽威回春振槁憫以尸居之氣察無它惡之腸更進文昌之貳官尙領河圖之祕禁擇其善地許以再麾本緣偃息之私更遂便蕃之數臣敢不勉修治體徧諭上仁循致樂蘇少寬肝膈至於遵宣尼之慎疾訪周氏之全醫冀及平疆再陪訪逮出奉會稽之最非敢告勞歸成麗正



景文公集 卷之六  
之書誓無私恨逢辰論報沒齒爲期

代薛資政謝許住京養疾表

臣近以久疾陳乞外任伏奉批答且令在京就醫藥將治者臥疾彌年未諧有損乞藩上奏冀獲自私狀危懇以下文枉溫辭之垂答深仁下濟槁質重蘇切念臣偶藉嘉亨入陪丞弼師師之訓無補官箴兩兩之符屢干台象緣食浮而取謗遂福過以延災肺腑爲痾腫息交選獲解中樞之任尙叨祕殿之名特免造朝以便藏疾官無三最亟煩予告之恩祿乃百屢居畏無功之責縣跨涼燠常備苦甘前愈未臻後劇

還甚竊謂已疲之馬難望君軒之前遂枯之根決無犧器之望輒祈近服庶續殘齡蓋且不得已而去邦非無情於戀主孤心如隕危涕自零敢謂陛下大惠不貲至誠時克曲矜舊物昭布大言慮下國之旣遙乏上池而取効俾留神縣庶就嘉醫屈原之魂九升招還有漸魏犢之病三百距躍可期獲延朝菌之餘誓畢夕冰之報

代謝加職任表

祇膺洪霈伏積深憂竊以鑿坡爲侍從之榮天畿居郡國之首唐垂四禁之制謹申命於時幾漢列三輔



之圖慎觀風於大眾必咨邦彥始允公言竊念臣材  
出下中世惟寒素先皇帝識自無聞之伍擢于尤異  
之科歷玷仕途窺寢王體九德咸事之世叨服上仁  
下官不職之誅幾煩深刻內惟陋寡姑守樸忠慎夫  
緇磷之遷安于庖祝之分屬以重明紹纂慈治協宣  
樂鳧鷺之守成並循先憲均山藪之藏疾垂采空名  
入玷星垣預裁芝誥昭昭天采罔裨灑噩之風坎坎  
河干坐愧淪漣之刺方議免冠之請以懲襍被之風  
敢謂陛下慎緝邦經恢明官式謂鵠長鳧短難強於  
姿材而免極犬疲可矜其悴盡俾條久次推進茂恩

升巖署之重深兼神臯之穰劇永惟二事宜得丞髦  
詎茲無狀之臣可玷煩能之舉雖祇成命曷弭類言  
謹當精索隱微勤居夙暮君如堯舜奉丕律以修詞  
前有趙張按成規而措事庶逃尸監上答睿明

代楊鄆州謝上表

蒙恩授臣知鄆州軍事兼管內勸農事卽於今日  
到任上訖謬分左契臨長東人提千騎之雍容有六  
條之森備出麾有幸坐閭增榮切念臣箕斗虛名邱  
園微介決科僅中論績稍遷邁明辟之纂圖忝望郎  
而升秩用惟枯木不自先容細及秋毫罔非帝力但



景文公集 卷十二  
罄如絲之亮曷知媚竈之求終賴洪慈免其大戾甫  
周一閏更典三藩銜竄藪以見容負支離而竊祿昨  
緣便道獲遂造朝許留數刻之閑俾與百金之奏俄  
煩節名改錫袍紋追露冕之爲榮均解衣而拜賜胡  
然頽陋縻爾寵光斯蓋伏遇陛下適駿先猷涵蒙庶  
品謂乎俎豆之無越矜其丹雘之可塗曾不疵瑕猥  
從器使伏况汶陽疏壤魯道遺黎昏作屢豐散厯俾  
父雖屬河公之近決不妨田畷之有秋惟冀至仁少  
寬中昃臣敢不內循丕訓上體寶慈列三壤之墮壚  
勤修稼政愛二東之杼軸底慎邦財儻臻樂職之風

冀贖浮人之刺

太后表

驟違天咫祇率星言趣四牡以載馳戾萬夫而樹政  
大東之奧剖左爲榮竊念某智本顛蒙數惟奇隻早  
辱縣官之使遂代上農之耕曾乏所長仰裨乃事支  
離有素居延受粟之譏樸屬而生久玷能官之詠連  
更郡寄再覲宸嚴清明會朝與陪於有著好醜必上  
令盡某所言復加五品之章以示百城之寵洪惟幸  
會寬絕擬倫斯蓋陛下仁篤好生惠深藏疾扶盧直  
鑄各盡於有能溢海附山或取其微益俾茲燾野尙



玷寵私矧汶上之名藩本魯初之奧壤承平在旦富庶散風臣敢不律乃蕞軀撫茲善俗中庸厥履日夜以思束矢鈞金體欽哉於庶獄杏華莒葉誠勤止於斯民少寬當展之勞上答包荒之賜

代孫侍郎謝加龍圖閣學士一表

天臺封札忽被於癯姿神閣置圖俾陪於清綴卽支離之病告參汗漫之仙游崇讓無從省躬增悞切念臣材非傑出世本曠僚志安草茅望隔青紫逮事真考擢備從官預擁橋門之經俄待承明之詔力非稽古陳車服以旣多義乃不耕食困禾而太厚託上仁

之兼養匪予取以見疵訖乏寸長以終云補陛下不承在旦善貸均休念舊物以軫慈由至愚而取信每緣濡洽薦辱進陞出則陪清道之遊入則奉邇言之問龍光所集儒者罕借頃緣匪服之災迭邁負薪之疾氣一交選體不自支涉月卧廬移書請急方將再拜歸道漸露乞骸之求百工咸熙少息瘵官之議雖私悰內斷會成命已頒謂寶構之凝嚴號文林之極摯青蒲規地近接禁林朱葉藏文居然帝所以原簪之未弃俾龍署以叨榮嘉亨允鍾夙暮深計且臣忝識大分久服近班伸於至明誼不徒讓又被寵先帝



景文宗公集 十一  
結犬馬之戀深歸報二宮慮桑榆之日短苟逡巡違  
命偃蹇懷安上孤圖任之私下取自高之譽臣雖無  
狀寧昧所歸輒拜貺以自天誓糜軀而有地儻神明  
之觀未耗而筋力之能可求尙當夜思晝行克守無  
邪之誠早入晚出懋敦時敏之方展四體以上酬泯  
百生而後已

皇太后表

華戶病居方累支離之嘆蘭圖祕構忽塵清切之司  
駭細札之已行躍羸軀而祇受一辭罔遂三省增慙  
竊念臣學術本疎行能無算起家東鄙玷迹周行紆

眞聖之誤知借邇臣之旅進淺謀料事無助幄中之  
籌直道干時常貸道邊之死計功未效僭賞云多尊  
號皇帝陛下察無它腸垂矜舊物忘其蓬穎之陋飭  
夫犧木之文超狷神深薦陪講勸而臣將身寡術匪  
服挺災及此首冬繼成淹卧造朝希闕伏枕纏繇且  
念舊章不忘臣則無胡廣之智大事垂問臣則乏仲  
舒之才在九戩以不盈去雙鳧而非少宜先引避以  
肅懦貪私計未行洪恩俄降罔示汰澄之責更階嚴  
近之資臣夙夜自惟揆卜尤審且下之知止蓋一身  
之謀上所懋官爲百辟之舉苟曰圖大無容後公詎



景文公集 卷之二  
可遠忘先帝之恩近矜小讓之節臣知非是物誰謂  
宜用僂俛以拜嘉勉婆娑而陳力冀調醫劑益就平  
疆厲乃樸忠絕其吐茹庶追玉堂之污少裨黃髮之  
詢一死可留期報恩而不朽三軍能奪誓刻志以無  
渝至禮不文感悰奚隱

代張相公乞致仕第二表

近以寢迫衰年啟歸宰政仰紆聖詔中祕俞音抱感  
雖叢撫情難隱伏念臣材資素下世系本寒先帝擢  
自草茅飾之丹雘不知駑鈍之素與聞政事之宜位  
過其涯民胥多謗時屬陛下茂溫文之懿膺七鬯之

承實參乃僚俾輔成德親奉清明之始已階極近之  
聯廩賜日優名器雙假自爾秉旄在外者再當軸居  
中者三責任併加謨謀弗稱羣臣之所同悉上心之  
所自知遭時治平容得無吝方今邊鄙未靖師旅且  
勤吏苦遠餉之勞民罹橫調之役上千穹昊延致沴  
災辰不用行風終而瞋煩側身於昧旦形罪已於至  
言咎靡自宓臣任其責當從司敗亟正嚴刑尙沐包  
荒趣圖就效然而鐘漏餘景迫已耄之辰蒲柳瘁姿  
無可勉之狀尙偷安於天秩必取悔於朝藪伏况請  
老者禮經之常乞骸者邦典之舊揆臣之齒久已過



期行已之方亦當專事伏唯陛下句全要領賜罷邱園憫盡力於壯時惠克終於末路至若動危辭任已寬弗忍之誅得謝推仁方伸不奪之志罄辭翹慮須可爲祈

代張相公乞致仕第四表

近以罄露乃誠上還所事猥紆深詔卽斷來章情有未申義無苟默罔逃冒格終冀矜兪切念臣淺器薄才遠塗暮景嚮緣舊物再忝上司貪懷感會之華久孤丞弼之委遂乃延災列象取玷盛辰師積歲以留屯人餉邊而重困廟議之失實始建明國典所懲自

當先坐而冥煩近識昏毫浮齡但安含妬之容罔慮妨賢之素靜言內訟悅悟前非是以仰丐菟裘之營苟紓石慶之責祈收印綬許罷邱樊外則圖天變之銷內則期台路之穆上全爲國之惠下安知止之常夙夜以惟始終交允且念士無奪志則臣之申請者三禮著引年臣之過期已七危悰備悉嗟毫幾何伏望陛下寬無狀之往誅軫必從之今欲俾其納政許以乞身得均請老之流是無齋志之恨必若寶慈未忍可制中留便當輿疾遁歸頓纓狂蹈自捐餘齒或累大恩言瑣喻繁所希開允



代張相公乞致仕第六表

茲者叩闈五請須命再旬畏責任之道悠迫退歸之日短未蒙順許始示褒存而言訥無可喻之情志窮有不奪之介尚餘確控終冀垂矜竊惟就列揆能審於自卜者臣之誼也疏祿養士恩不聽辭者君之仁也推其仁所以穆御邦之要秉其義所以崇視履之方事主保躬二端而已如臣者早緣舊物更踐上司高秩厚封乘時而感會瞽言謬策見納於睿明筌宰相期底裏交照至於三揖在下靡猜貳之嫌百度興朝皆聖真之舊臣雖無狀容可自安但以衰朽之年

朝夕難保法當得謝古所引年久尸厥官焉用彼相異日干校人之議煩司敗之歸雖使函海包荒回霜屈憲而叟臣秉誼得無愧知止之明元后推仁且將詒鮮克之悔今茲納政允謂得宜伏望陛下普訪羣謀追觀往則巧全要領俾守邱園紓日昃之深嗟免夜行之明刺亦且萬無纖隙可累於朝猷百兩餘生有終於天造翹心引領用俟俞恩

代乞罷第四表

比以三陳奏牘上納政機願乞槁骸得去公路而中詔垂錫俞音未開切敕斷章卽遣視事苦情既暴拙



喻已殫不能拂天聽之崇高回帝衿之感惻拒命誠  
罪奪守愈非竊執愚冥終祈順許恭惟窮其所不能  
者非用技之善覆其所既滿者非愛飭之謀矧四海  
安危萬樞濟否用父厥辟相惟其人苟器非所堪力  
不勝任覲覲之量已試而績弗成諄諄之衰日偷而  
老且至內曠天緯外譴人言借使藏疾之君昧進之  
士亦不容久于倚注叨此宴安况臣雖乏猷爲粗知  
廉愧以兩朝含育之厚加三事論思之崇儻可勉行  
敢云顧避蓋念慮昏才盡日索運奇帷幄之計無良  
邊鄙之饋數屈師拏不解天變仍臻不當持燭火以

冒晨啖腊毒而求飽辱國爲重謀身乃輕是以赴訴  
睿聰必期徇請輸竭私悃止冀避賢雖知而復知近  
乎煩而可言不言謂之隱顧臣自揆須聖洞明寧觸  
煩以致愆不涉隱而蒙上伏望陛下推王者之法据  
天下之公念孤臣之竭誠免司敗之論咎止全終始  
直俾罷歸休息殘齡弭除來謗黜瘝用智允穆於朝  
風斂分收崖并全於介節一諧茲舉兩便乃宜延聽  
曲從始違寧舍中外人之大無善可報因辭嚴謹  
事道謝御筆批表 尚恩劉帥至開垂開大破前聖  
伏蒙聖慈以臣上表乞罷免重任伏奉今月三日御



筆批答候郊禮畢一年後許退不得更上表求罷者  
事散情迫業已啟聞恩隆喻至罔垂開允刻誦聖訓  
傾駭乃衷伏念臣中之才無善可錄因緣過聽叨  
冒上司奉承明制而宣之朝什不能五總領羣務而  
達於上什不能三徒以斷斷朴愚區區慎蕙旅進旅  
退不敢後人公車公言止於寡過若乃調度兵食由  
匱取豐羈致戎獯化桀爲順靖多辟之俗去無用之  
官訂正度程變撫樞極則臣之自視性有不能陛下  
雖欲庇之至仁貸以不死謂憊則可恕謂直則弗疑  
奈何妨賢之譏謹而弗可解備位之責至而弗敢辭  
今臣順命則取尤違詔又抵咎稱疾以邀上則詐俛  
首而還位則慙茲焉危窘匪謂文飾而且寶筆親示  
金口宣聞旣賒歲期仍畢禋禮切却來奏獎卹藁軀  
粗識名教之方敢渝君臣之誼恭遵慈敕已默費詞  
誓勉不肖之材上酬再造之賜然念年齒頽邁精力  
耗殘陽雖蒙榮陰或取譴悔常待亢吊止在閭終冀  
數月之間更續乞骸之請眷深難荷感至無言



景文宋公集卷第八十二

景文宋公集卷第八十二  
表  
臣某言伏奉制命云云者台司云缺方謹於咨俞恩  
贊所延躡加於轄短內循能而不稱進即寵而匪違  
敢格褒音徑敷危枉中謝竊惟鈞柄之總邦緯是毗  
膺朝夕以告猷一統類而為職周設三公也惟人而  
備漢分兩府也待選寔艱至於公孫開陳良知作相  
之有體建平風采稍比治郡而損名益知重雍撫期  
同寅責實能哲所以垂惠注意在乎已安詎俾無庸

景文宋公集卷第八十三

表

代章集賢讓表

臣某言伏奉制命

云云

者台司云缺方謹於咨俞恩

贊所延躡加於轄短內循能而不稱進即寵而匪違

敢格褒音徑敷危枉

中謝

竊惟鈞柄之總邦緯是毗

膺朝夕以告猷一統類而為職周設三公也惟人而

備漢分兩府也待選寔艱至於公孫開陳良知作相

之有體建平風采稍比治郡而損名益知重雍撫期

同寅責實能哲所以垂惠注意在乎已安詎俾無庸



首虛茲授如臣者材駑而底門悴且寒本務自知弗期孟晉第以仕超所願之表用浮有智之涯擢始禁林越陪樞管高門之地常重遂用人輕天下之務惟幾舉煩中覆省私未報引領安歸用惕若以因時幸儻焉而補過不圖欽睿更誤念求僅踰一稔之期遽承三吏之乏賞階暴峻功號頓蕃重書殿之榮資衍爰疇之實幹王言顯布公路騰咨深惟得失之間動關休戚之大在易之鼎覆渥戒其攸占觀天之階疏比應而如響詎止貽於身悔實并結於朝譏與其被匪服之辜寧容嬰如慢之責伏望尊號皇帝陛下察

至誠之有素惜重器而罔私降采多言追還麗澤改詢廊廟之懿參熙筮宰之隆特丐衰齡且仍故職布盈辭而近瀆須允報以爲期臣無任

原伏

代章集賢拜相第二表

臣某言確至上陳危言若訥猥煩救曉尙闕俞從內省冒陞罔諧寧舍中謝臣聞力不勝而強用者儻石益之則躓視既勞而猶察者輿薪值之亦昏何則才局於素定之倪效屈於用多之廣早明茲理敢誓同辭伏念臣本自諸生不經遠物雖圖筮仕止望易農嚮緣邇禁之聯遂忝鴻樞之領投醜嬰屢缺之畏躡



足微必勝之籌衆不可誣事皆已試寧足越司天宰  
之柄上憲乾台之華昏于已窮躋乎強用名器者天  
下之重師尹者列辟爾瞻濫始于茲下安取法抑又  
聞宜負而乘小人之盜實招不狩有鴟無功之祿爲  
刺巧於室者弗令撓而貽壓愛其器者非欲滿而就  
傾如臣所懷舉皆類此况今權綱俾父憲度交修方  
當訪弱翁之賢總領衆職資胡廣之問練達朝章無  
令蕭枕之餘首玷論思之地伏望尊號皇帝陛下念  
任人之尤重諒省分之足矜質臣以彼已之言許停  
贊刻免臣以疾顛之咎俾示曲全耆哲在廷俊髦布

列枚功而舉謀國必臧瀝危欵以罄間仰睿音之垂

可其代書請復常膳第二表

臣某等言近以常饗未復繼援舊章溫檢垂頒尙稽  
允報征營失措昕夕靡遑臣某等

中謝

伏惟尊號皇

帝陛下若古宣猷右文敷治克相上帝寵綏下民懼  
一物之失宜冀九功之攸敘嚮以歲元肇曆乾緯流  
占特刑罪已之詞恭循菲食之變勵翼庶政焦勞聖  
懷亟躋格於精裏用振除於餘咎天威旋屆人情汔  
康謂宜卽參禮典之中還登牢品之具進嘗珍旨侑



景文公集 卷三  
納粹和陛下過執夤恭淹餘旬晦務謹哲王之戒久  
隔太官之常伏況體有等威誼無降抑垂裳當亡躬  
朝夕之甚勤侑樂養恬濟剛健之常久敢緣固請仰  
丐俞音願收天保之誠復備君庖之舉庶俾柔嘉玉  
食不空惟辟之文闡實陽休更盛無疆之祉費詞已  
罄須可爲期臣無任

代章集賢謝恩表

臣某言近以誤被制函躡升台府剡章伏省昧死還  
恩煩允命以申褒勅攸司而趣拜事移願始懼集寵  
初中謝竊念臣孤遠微生間關平進本謀干祿纔望

亢宗然而運有親逢之期朝無不肖之疾遂蒙君養  
寢撫仕途伏遇皇帝陛下執競熙圖垂明建極翕受  
九德練覈庶工擢始冗官之聯贊爲名命之重深遷  
禁籍進侍經帷拙者於用雖多何嘗云補儒家在要  
而寡固亦自知叵言善任之辰居濫升樞之委尙以  
三垂撒聳五刃久囊奉行止更踐之常論思無調發  
之遽得容樗質猥貳天機內畏將車之塵方詒踈馬  
之泛更叨懋冊超對上司臣雖妄孱粗識涯分蓋三  
事非庸庸之忝萬樞倚贊贊之資與道同底者亮采  
實毗以聖責愚者取敗尤速徑披素欵薦控睿聰陛



下業已延登亶無中止遂乃出綸之信闕乎銷印之言勿使固辭敦令就職矧以階封並峻職號兩崇叢鉉席之異儀絢槐朝之華典抱誠終廢順命茲慙敢不免叩邦猷力敷民藝夙莫之勞是念窒隙之智畢陳但慮俯積謗囂上延災譴被鄒人焉用之義煩漢家卽免之文脫收效於涓毫冀紓期於顛殞

代夏尙書讓節制第一表

臣某言伏奉制命授臣節度使檢校太傅云云者朝綸疏需闡鉞頒華任匪值能誼無苟進敢淹茂冊仰訴危悰中謝伏念臣出自孤生厯專樸學嚮圖干祿

正敢代耕先帝擢始下陳俾升近綴及其強力試以方州屬丕后之龍飛齒舊人而魚貫入階峻秩寢服清光超貳乾樞之繁間塵台路之采拙艱自守明睿素知緣久次以出藩歷四期而蒙召還專計扁實寵使名習見文治之常焉知方略之總不謂中軍謀帥西屏須才過聽妄庸顯膺節制竊寰圻而書社叨公傳以視官內循甚愚猶識常分蓋知役非其長則憚任過於力則顛况欲乘華領之早衰勉虛弦之餘怯秉髦制敵跪轂啟行上副萬里之明俯全百勝之決求于宿將庸或爲難揆之迂儒孰知其可且勸能莫



如責實累國過於災身匪敢自私所虞有悔伏望尊  
號皇帝陛下普詢公議追止徽章貸格詔之近愆收  
殿邦之遠計改圖善武趣立茂功昧死申祈俟兪知  
免

代夏尙書讓節制第二表

臣某言此者仰列需函上還帥節未蒙順許滋極震  
遑終恃至仁更申前請中謝竊以師無常克視律之  
否臧官不備求惟人之輕重是以楚郎方用鄰席側  
而靡安漢傑已登中帷坐而論勝故能抗威齊斧躋  
秩齋壇有臣如茲何賞之遴若臣者本緣儒進偶與

仕期躡躡自將之厘斷斷無戈之謹或施之刀筆或  
責以簿書雖曰曠官不過任咎至於顯膺誕告之渥  
專制中權之雄一失所謀交累而國安得冒顏於授  
受之始隱情於進退之間僭此負乘假我名器徒使  
有功罔勸先啟邦人之媮應敵非長方詒史氏之誚  
拒恩誠罪知分可矜伏望尊號皇帝陛下垂亮苦言  
卽收成命兪求慎將付俾元戎庶當注意之辰弗維  
維塵之論懇悰斯極開可爲期

代夏尙書加節制謝表

臣某言一昨啟避將旄重垂恩詔罔誅煩請卽俾往



諧孤願易遷徽章難拒臣某中謝伏念臣出于羈齒  
弗逮遠猷振蹟先朝被榮華且淺謀與政孤操奉公  
顧匪服以叢譏殆多憂而損性氣隨事耗體與年衰  
徒仰蹈於盛明遂自忘於効去因浮所食勉宿爾官  
何言右武之求首被中軍之忝外廷顯告褒冊蕃臻  
擢一介之懦微冠十聯之雄重矧惟推轂之選本待  
出師之行而三純以來二垂撤警寢成威械之偃絕  
覩檀車之勤遂使開幕建牙惟專受祿屬韃汗馬無  
所效功今此僉求止圖靜知愈爲虛受固願上還至  
於秩視宗工地分邇輔兼憲司之劇職鎮威服之要

區雖參寵戎行而更爲身幸此蓋伏遇尊號皇帝陛  
下念人適乏超刈於謏材謂令已行罔收於信賞趣  
交瑞節馳領故都拜命茲慙省躬思報敢不懋經方  
略協布教條上體眷懷力期綏撫冀彌愆於老學得  
從事於新書獲列萬分誓甘九殞

代石資政乞外任表

臣某言臣聞力止所勝是爲知分任適其量迺無敗  
材故上揆能以命官下揣已而受職有一異此誰不  
致顛臣之危悰正本茲諭中謝伏念臣稟生單茶賦  
性憊冥曩在弱巾卽泐仕牒太宗以舊臣之子籍寘



朝闈眞宗以斯文之興引內儒閣間膺煩試因用稍  
遷寧無吝瑕訖賜全護伏遇尊號皇帝陛下繼承在  
旦清明有初因料羣材并收無似蓋十年不調方冀  
罷歸而三世爲郎猥爲上識寢司書命采人禁林式  
金之度無禫不稼之困奚取越陪機政噴竦輿言果  
以非人亟蒙賜免尙緣踣屨之念入塵華殿之資臣  
之親逢未見前比然臣薄祜有底頽齡早侵今春以  
來卧疾尤數風干膂脉發卽眩迷氣選肺膺動多危  
喘久蒙假急虧奉朝參臣非不知寵難冒居病當劾  
去上還印綬退伏邱樊奈何聚族苦多治生無素先

產耗竭私帑單虛惟仰俸泉以辦家事是以節爲貧  
奪愚恃眷忘冒行鍾漏之餘苟圖溝壑之濟洪私再  
造有忝無酬茲者羸瘵所乘趨步尤梗屏居難久公  
議必興欲望聖慈許臣知潁州一任爲歸老之漸旣  
緣近輔且便沂流稍入足以充宗僻左可以藏疾儻  
蒙從欲是獲更生臣又聞出者以作守爲優處者以  
入朝爲重事非相戾趣各有殊上哲詳觀物情非遠  
如臣者結髮從政五十餘年未始一朝輕去雙闕今  
焉昧死非曰孤恩直以迫知分之言畏敗材之辱秋  
葩離幹理有適然老馬去軒願非獲已伏望陛下好



景文公集 八  
仁本於觀過善始念乎愛終開錫俞音就成素願委  
之卧理敢自比於昔人勉乃奉揚尚力希於循吏抱  
誠至窘赴訴不文忤日翹懷仰須垂可臣無任

代宰相謝傳宣入伏月令午正歸私第狀

右臣等今月一日中使傳宣自入伏日令臣等午正  
歸私第者炎隆乘序慈哲推仁以畏日之方陽且揮  
汗之相屬特容夙退俾便私居仍盡伏金之辰始舉  
常驂之限仰銜優遇交極感懷况臣等曠位居多計  
功無補晨趨暮出自有成規趣駕先期猥煩寬詔欽  
服從人之惠諒無蒙暘之痾共誓交修少圖稱報臣

等無任

代昭文相公乞罷免第一表

臣某言臣聞無能之臣至仁靡畜焉用之佐上聖所  
譏何則名器有分責任無假從古治亂本三公之非  
其人累朝罷黜固宰相之自有體天下公議王者難  
私老臣至懇君聽宜亮臣某

中謝

伏念臣生自下國

系出單門先帝擢之艸茅華以纓弁慙課刀筆備嘗  
風波還齒朝韃之趨引內文林之選孤根冉冉因得  
少安弱羽翩翩其如長醜伏遇尊號皇帝陛下運隆  
闡繹政重持循見矜華領之餘謂非它腸之惡越司



綸省尋玷玉堂思以中乾而遲辭由外重而拙敢圖  
晚路猥副洪樞文武之略何施負乘之寇滋集未淹  
再歲俄正中台于時主者見敦不容還讓處士之議  
已自沸騰尙冀飭櫛液以構材勉契需以致遠旋屬  
黠羌畔命西鄙宿師餉役繁興保戍係出賊不時定  
汔茲五年財所當調動且億計縣官空乏斯人歎愁  
職居者敗墨狎聞師行者逗撓相踵以致斗落觀釁  
須索靡厭璽書撫和猜阻中定此皆輔弼亡狀處置  
乖方淺慮不可計深局謀不足料遠六翻無助九鼎  
爲輕上遺主憂下速邦侮臣猶知罪人其謂何是以

去歲中昧死乞身稽首還政底裏罄露親近具聞所  
望改詢賢臣翊亮天綽親奉聖訓使須後期適以機  
省務煩分提劇使久之冢宰病去因冠上司遂復僂  
俛卽恩遷延待罪助經羣務又及一暮今狄旣申盟  
戎將悔禍漸期屈伏圖致靖嘉則臣之經綸止極于  
此臣之引避正合其宜非不知變調陰陽和一統類  
時庶百穀仰澄三光使夷狄莫敢不王臣工各任其  
職柰何性分有止強勉難成臚脫於扛鼎之前手傷  
於代斲之側又况年事云耄體力已衰盛憲之憂陰  
耗於百慮師丹之志顯廢於萬機庸得自寧以數大



事伏望陛下察臣試可之無效憫臣底力之不前赦其空疎賜以停免重惟疆場尙警水旱相仍帷幄急咨謀之秋廟堂非充位之地早垂矜可庶息謗囂退一罔功則材士胥勸狗一知止則薄俗自散此物此心明神可質以終以始睿口是憑敢追煩辭止希得請臣無任

第二表

臣某言臣近露奏章乞辭重任奉被訓答永賜開俞蓋言拙者情有不通理迫者義難自隱敢空愚臆再叩謀聰中謝伏念臣資稟無庸志願有底逢辰之盛

爲食所浮旣承乏內樞遂待罪宰相昧於牢讓輒爾冒居室大楹小者何撓之能支綆短泉深者胡汲之云濟叶佐萬務出入七年而政不時經民罔用又內微開陳將順之敏外乏總領折衝之猷徒以駢致久安奉行成式力殫而任益重足蹟而道愈悠考課無成中外同亮弗能則止從昔以然且臣負責當免有三謀私可歸有二臣聞善宰者使中國尊大四夷賓服民不捐瘠天無災譴雖國嚮厥福而身預其榮今夏賊弄兵滙酋丐貨倔強沙漠首鼠邊郵千里之饋告勤五年之戍不解天誅淹久廟算依違臣之宜免



景文淵公集 七  
一也內自淮浙旁泊荆閩雜調併科比屋咨嘆輸錢  
轉幣列郡窮虛京陝之人勞役尤甚去便居擾官濫  
吏私講張之盜竊登捉搦之使中出臣之宜免二也  
寶元之後大變仍臻地震定襄日食九朔白晝而晦  
經纏失行民食寢艱地寶逾愛害氣未究民言莫懲  
臣之宜免三也臣齒慙既暮形質早衰晝視文書則  
昏忘相半夜偃牀簀則呻倦併來牽勉而行僵仆將  
及臣之可歸一也且臣冠男笄女天枉相繼擠溝砥  
犢悲割屢嬰蓋顯責未加陰譴先及惟一息方幼未  
能應門百年收骨誰爲臣計臣之可歸二也負三當

免之責二必歸之私縱元后至仁且容備位而天下  
大議於何可逃伏望尊號皇帝陛下念四輔之惟其  
人憐一介之守其分以量能爲哲以從欲爲仁特沛  
玉音許能魁柄俾全要領得守邱樊始終之惠兩成  
公私之計借允况二垂面內多士獻謀師律漸精治  
具尤飭方當別咨英輔速就大功明黜叟臣靡妨賢  
路成命朝出多謗夕銷延素天闈企竚矜遂臣無任

第三表

臣某言伏蒙聖慈以臣再上章乞解重柄特賜批答  
不允仍斷來章者煩辭薦露中詔報聞仍枉慈音卽



停後啟荷戴無量涕泗偕零臣某中謝竊以明莫先於自知勇莫近於能耻自古通誼爲臣大方苟渝斯言不可以訓伏念臣材識驚下年力尪殘感慨宸恩婆娑台路愒日三省未夜九回蓋注意於安則百度所修未臻至治試可乃已則七歲之績果於弗成戎醜其心兇邊民勤戍執咎之職匪臣曷歸是以頓首屢陳於前誦言必請於上願還大政以穆具瞻而睿眷見私朝議弗聽抑此孤抱廢爲空文雖易戒三瀆之尤而志矜一介之奪敢煩欽誓更賜裁俞臣又念感會之來纖介無愾上則大明垂亮免數辱之虞下

則同僚協濟靡不咸之隙但以彌綸任大僕慙智殫高能名危亢實貽悔塗遠於日者負將暮之責形分於鑑者致必窮之哈此皆驗于已然寧待多喻安可以華皓餘齒更昧自知之明丞弼宗工遂違能恥之勇伏望尊號皇帝陛下量其盡力推以至公許還樞機避賢者之路賜全首領散大君之仁早獲罷歸是逃罪戾必若砥鉛鈍以嬰割徒作庖羞竭馬足而泛車不爲御巧言窮寢拙心迫逾危抑控天聰竚聆制可臣無任



景文宋公集卷第八十三

景文宋公集卷第八十四

表狀

代楊太尉讓加節度使第一表

臣某言伏奉今月某日制命以脩大內了畢加臣某  
 官落成在旦懋賞均禧由置局之有經枉推恩而異  
 等罔功已甚拜賜不遑臣某中謝切念臣自闕茸之  
 中邁亨嘉之會器非適用食乃浮人椎頓少文罔裨  
 於紀律樸忠自任僅宿於官箴猥蒙大度之容進貳  
 中樞之職一昨大營層構別建攸司領使以上公之  
 尊咨副於邇臣之利不圖推擇偶及妄庸臣於斯時



罔及崇讓誠以二宮側身之際百役僇功之辰翼率寸長仰寬旰食其如庶民樂勸百堵並興有茂宰以建規有勞臣之宣力臣但參陪廟算奉行符攝無黍累之重無涓塹之勞汜太紫之雄成塞天淵而渙汗猥紆成命序進寵名錫號以紀庸爰田而行食本兵劇職疏社近藩而臣退省其私何力之有掩上之功則在體不順掠下之美則多謗其興取身之災爲國深悔兩失其道入將謂何伏望尊號皇帝陛下收已樹之仁据循名之實許還誤賞無俾濫官責其陳力之微紆之害盈之咎日有三舍或遇感而必移志在

匹夫信有誠而無奪援天惟切得請是期臣無任

同前上皇太后第一表

臣某言

元元

斯干勿亟式壯宸居麗澤遂行首褒樞

筦自貪天而冒賞舉跼地以增憂

中謝

切念臣智效

有涯親逢爲幸宜疏而稗濡翼于梁倚上聖之兼包  
遏煩言之舉劾擢於宿衛升在樞衡間屬完復宣溫  
繕圖輪奐事資專達別建攸司官必有聯用均底績  
臣始從末至遽二敷求冀千慮於參裨希萬分於報  
稱而寸長自驗任重衆知上則祇稟於謀謨次乃倚  
成於衆力秩未加而爭勉功不日以慶成千門翬飛



景文公集 卷十四 三  
百堵山立而臣委蛇在列拱默居官訖乏僦功之能  
仰裨煩使之任今乃温辭誕告列位徧聞特移近鎮  
之崇兼領上公之秩任官密勿衍食豐融曾是冒居  
疇能安處雖含垢者天道姑務樂成而缺望者衆心  
無容厭伏伏望尊號皇太后陛下察其退省惠以克  
終追改命書弗加虛飾必若篤臣隣之分懋功賞之  
科則陳力有期或容於積日陟明無濫更俟於宣勞  
臣止乞比類近班例升彝序庶乎不僭以肅無厭願  
回從欲之仁垂采薄言之訴怔忡于此俞可是期臣  
無任

代楊讓加節使第二表

臣某言臣近以併塵寵數亟達讓封猥奉訓辭未垂  
順許夙宵惟念冰谷震惶臣某中謝臣聞官惟其人  
受授存乎實賞不可僭輕重視其功故師錫則勞臣  
不疑冒居則處士橫議大猷所繫從古而然切念臣  
一介非夫兩朝善使雖微幹裕絕有它腸承空乏於  
樞庭速謗囂於鄉校法宮雲構偶貳使權麗澤風翔  
第膺賞級蓋聰謀之抑畏答大儆於高明與物惟新  
祈天永命如臣無狀爲國具僚慮不先幾事多遺策  
至仁在宥裁赦已多詎可當憂勞之辰自安過寵昧



廉隅之守以啟偷風取身咎以不辭玷國經而爲惜  
伏望尊號皇帝陛下酌於舊典斷自清衷俯念芻蕘  
追還渥縟示名器之尤重俾顛債之罔加祇埃俞音  
用寧危悃臣無任

同前上皇太后第二表

臣某言臣近以崇進寵章輒騰讓奏大言垂咎成命  
未還慙震所并啟處無措

中謝

切念臣材姿蹇淺地

望單平獲對聖明遂階樞柄汲深綆短自審於無能  
材敗錦傷慮墮於有典伏值國家從周考室嗣禹卑  
宮獲贊事經亟成丕績惟當陽之引咎因肆肯以翔

仁首眷近班竝推異數鴻私交委危懇匪寧何則密  
勿之司體均休戚彌縫之任責在臣隣當九重旰食  
以勵精寧百執宴安於受爵上虧治表俯畏人言伏  
望尊號皇太后陛下垂照危悰曲全瓊質重名與器  
罔俾於官邪收縶以綸特從於人欲儻追易盈之責  
實銜再造之私臣無任

代楊太尉加節使表

臣某言近以虔奉制恩驟加寵數尋露章而再瀆冀  
還賞於至公薦枉慈音仍斷來表祈天靡諒拜命錮  
榮

中謝

切念臣論品下中賦材弱植緣先朝之誤寵



收一介之微勞感會風雲汚塵名器執戈外禦適邁  
偃兵不期涉汲序升遂竊齋壇之拜總提師律拱衛  
宸居積日爲慙無勞可紀不圖聖獎擢貳近樞坐席  
未溫營宮勿亟咨宰庭而命使挾戎帥以領徒曾是  
妄庸亦參經畫逮落成之告始顧居逸以興懷首詔  
攸司聿陳盛禮應天以實哀對於廟靈與物惟新茂  
宣於雷解祈年易號集福推恩而臣底績至微備員  
有素因端闡之第賞迂溫檢以開榮視秩本兵建藩  
維翰益勲臣之殊號增采邑之真封矧基命預聞邇  
臣同體上方引咎克謹於盈成下或分功何顏於啟  
處寵靈踰分震怖裝懷慙懇固辭成命難寢亟煩褒  
諭祇益罪尤斯蓋伏蒙尊號皇帝陛下變復在辰寬  
仁布度姑厚惟平之施勉從寧僭之科臣敢不祇服  
訓言罄輸忠力防幾事之誠無俾害成佩進思之言  
更思瘁盡永惟素守用質幽神臣無任

同前謝皇太后表

臣某言近膺制命崇進寵章再瀝冀悰危同悞賞俄  
枉斷章之旨俾遵踐次之規狗守莫從拜嘉何幸<sub>中</sub>  
<sub>謝</sub>切念臣本由羈齒獲邁亨期頃在先朝已嘗劇職  
協華繼照圖舊見收擢領干城留參離衛漢臣少贛



景文公集 五  
僅乃過之林父盡忠自知底止偶借天聿遂貳帝樞  
親佩疇咨之言與聞甚衆之事營宮度構置使慮功  
匪伊乏人姑願宣力而靈臺勿亟斯千落成惟翼翼  
之小心答高高之深戒肆類霄極抵格廟祧沛爲鴻  
恩賚及羣品薰至和於有截示昭德之不遲乃眷臣  
工並推獎數而臣揆庸最淺進律首加奄土宇之畷  
章擁器名之烜赫疾顛是懼簿訴載勤而孤根莫隔  
於青春幽室遂均於白日循牆罔獲濡沫增慙斯蓋  
尊號皇太后陛下協暢懿綱輔成至治謂已行之賜  
寧僭而不收俾無用之臣未勞而先祿敢不力希汝  
弼務告斯猷式是柔嘉保乎慎密循孤生而有訖論  
厚報以無涯臣無任

代讓樞密使第一表

臣某言伏奉今月五日麻制授臣依前官充樞密使  
餘如故者躡等之恩猥加藁質木兵之地超次宗工  
聆誕告以不遑撫危心而如灼中謝切以天人感會  
之要夙夜宥密之嚴號爲樞衡罔私名器自匪安世  
之慎林父之忠履無重剛之疑進有九鼎之重必程  
茲効始勉冒居如臣者根柢微材斗筭近器親逢聖  
旦假厯要塗將將之仁上依於漢度師師之序久玷



於堯官中寢告成攸司何力例蒙霈寵改任近藩讓  
不獲從坐猶未暖旋頒渙號俾正使名總異數以大  
來匪孤臣之克荷且臣聞之愛官同乎美錦用士異  
於積薪使人皆學製則百度且虧後而居上則有功  
不勸而况擢于數臣之末抗乎三事之尊力且未陳  
進仍無漸伏望尊號皇帝陛下據其器使貸以滿盈  
追罷徽章許仍故處用勤補過少冀於萬分慙級升  
階況存於有典庶全邦體恭俟天從臣無任

同前上皇太后第一表

臣某言隆名烜赫異數便蕃辱誕告於王庭俾顯升  
於樞府缺然無狀惴若臨淵中謝切以運動三儀木  
之機軸昭明萬事責在股肱自置使以居中匪得人  
而莫可况乎下武尤慎曠僚伏念臣系本孤平材微  
開濟由驂之靳四服於馳馭如山出雲偶邀於期會  
任圖大事茂報萬分因考室之微功辱改藩之茂渥  
號封兼列錫予孔蕃方且澡雪愆冥講求故實俟愚  
者之一得塞小人之攸箴而成命薦頒榮階逾縟由  
數臣之後進領上司未三旬之間再煩大貺願惟冒  
處實速多言且用在材表者有必窮之期賞超功外  
者無能守之實下取四夷之哂上紊百工之倫祇悔



景文公集  
既多害盈可待伏望尊號皇太后陛下諒其悃悞輟  
乃寵章且延積日之期俾竭寸長之效漸希有補乃  
議敘升在受授以爲宜亦等威之不僭儻蒙順許是  
免顛隳臣無任

代楊太尉讓樞密使第二表

臣某言昨以肅膺茂典進列上樞亟露奏函願還賞  
典蕞爾之誠無感往哉之訓不移夙夜以思慙慙罔  
寘中謝竊惟官可以闕不使任非其人邑雖與多無  
容假之以器何則十手甚衆百度所叢允當則不命  
其承虛授則浮言胥動况幾微開策左右仰成累苟

及邦身焉賴寵重念臣甫從未至未究大猷猥屬建  
元例蒙進律已忍慙而冒處冀陳力以少疇寧謂宸  
衷過私贊書旋降正名宥密之署裁成一二之機內  
揆妄庸曷先勝處夫棟幹或撓則困於衆材馬力已  
殫則泛其所駕國之闕政常必由之士有食功亦宜  
底上伏望尊號皇帝陛下追收允令改命賢能暴剗  
牘於百工紓賤軀之九殞罄敷危控虔俟兪從臣無  
任

同前上皇太后第二表

臣某言近膺明制擢拜上司入並宗臣對執樞柄尋



露情於尺奏冀收縛於誤恩答命雖頒俞音彌阻省  
循于再震越無從中謝臣聞善持器者不欲滿而就  
傾巧度材者不使曲而強直物宜尚爾人理則然故  
責功者過量乃傷陳力者不能而止敢緣斯喻備述  
愚衷切念臣慮靡經邦官纔宿業獲階近綴未及半  
朞爵與眾而例加讓蒙恩而弗聽瘝官之誚曷日可  
逃不圖含垢之仁復舉揚庭之典知小謀大任重道  
悠國有曠官身餘後咎脫致彝倫之紊寧容一介之  
誅伏望尊號皇太后陛下體斷斷之能居然筮短察  
懷懷之請罔俾官邪許停投受之恩實荷平成之賜

代楊太尉謝樞密使表

臣某言昨以叨膺茂典入筦鴻樞伏省戶以陳章巧  
綈囊之收霈危悰再瀆明制必行懼煩失以致尤輒  
進思而冒處中謝臣聞佐王基命簡在臣鄰秉軸居  
中本之兵柄非有號令風采爲下所瞻則必幅臆謀  
謨熙天之載異於茲道執匪曠官切念臣材散無庸  
地寒寡援興顏行之下因得累勞陪周衛之中罕嘗  
進熟見容漢皇之度久總軒師之營貳掌繁機佐經  
中寢會落成而不日因茲祀以祈年汪濊深仁導迎  
協氣而臣弗從災異之免更加名器之多寢嘿懷安



委虵就列內循無狀自詭必酬何月律之未淹沐天私而載造擢于末綴遂正近司輒成奏以讓還枉深辭之切敕簿言匪控進拜增羞助百姓之昭明行虞辱國于六符之疏闊舉異談天斯蓋尊號皇帝陛下養以至仁赦其少戇同五帝之親事不及有司俾一介之孤臣無空大位敢不益勤緜力罔伏舊章期有輔於萬分敢自紆於九殞臣無任

同前謝皇太后表

臣某言近叨恩制俾正樞司伏閣上言願還於成命斷章催拜再枉於慈音固讓莫諧冒居何幸

中謝切

念臣液櫛林散培塿地卑獲對聖期屢揚劇任敵王所愾既會於偃兵積日之勞何從而塞責洪惟職覆深諒由衷斯謀斯猷則罕嘗入告予求予取則不議汝瑕由先帝之舊人貳禁庭之幾事屬圖考室兼議僉功燕寢乃安顧成竝享紀年肆眚捨爵計功首膺無虧之言已換于宣之數僭夫國典布在人言匪謂天眷謬加寵章尤渥靡論彝序超據上游壅薄訴於危心隔蓋高之善聽光華異等震抃裝懷三接諮諏未識主臣之對萬機處可曷臻密靖之風乘是泰來缺然虛授此蓋伏蒙皇太后陛下道敷善養人不備



景文宋公集 十一  
求貸衛綰之孰何取子顏之謹質特捐厚禮期責寸  
長顧懋賞以不貲誓捐軀而有所臣無任

代楊樞密使恩加第一表

臣某言廟藉蕝儀竝修於典業飲勲論至申告於治  
朝顧無狀之具臣濫本兵之右職便蕃荷寵慙媿交  
顏中謝竊聞賞以功爲重輕官用能爲次序故公器  
者假之于下則伐檀之刺興天秩者授之以庸則緇  
衣之風勸上關損益昭見典章如臣者志抱樸忠任  
非文敏攀鱗附翼實出親逢壯事老謀驗于已試擢  
升宥密未闕歲時蒙含垢之至仁遏空餐之橫議豈

惟天幸亟相帝容陪駟乘以清塵從春旗而服土徧  
升七室用劭九農而臣自始屬圖則乏倪寬之建白  
逮于相禮則有孟僖之坐慙奉凝蹕之還衡瑑温瑜  
而升冊曾微千慮少答萬分免戾爲多開榮非覲又  
況崇階異數衍食陪封卽舊以表其新臨懼更延其  
寵臣躬雖幸國體謂何儻腊毒以冒居實敗材之行  
及伏望尊號皇帝陛下推明有典詢逮羣言用必殺  
其所長賞不加於非次收還成命昭示倍官弗興鐘  
鼓之妖俾緩冰淵之懼探情非飾瀆聖奚逃臣無任

同前上皇太后第一表



臣某言廟筵升禩陽土就耕竝成希闕之儀徧第臣鄰之賞顧惟輜質猥玷近樞優渥首加震惶罔寘中切念臣器非適用材不及中感會風雲湔除埃壘謝慙更華劇滋驚歲時曾不能僂俛宿官從容進議建明事望練達政宜徒以上庠晏晏之仁中懷齷齪之謹曲輪直桷有性分之專乘鴈飛鳧無盈虛之繫入司機筦參決謨謀屬以慈極奉先長君勸穡枚枚闕宇薦一德之馨嘉昫昫大田震九陽之滿青禮兼今昔聲塞天淵而臣但荷親逢絕無云補將順其美則當國之輔在焉屬圖其儀則薦紳之儒戾止安可因飲至之際遂竊崇階無計功之差例增采戶使勞臣缺望多謗沸騰儻貽敦於代天諒胡顏於接晝伏望尊號皇太后陛下察其知止惠以有終協贊當陽垂收渙汗且夫物過于鑑則照有必窮鼎渥其形則鍊將必覆願回慈護矜允危悚或免戾之可期實捐軀而知報臣無任

代楊樞密讓邑封第二表

臣某言此者甫屬勞還例蒙進律卽憑露奏切冀回恩嚴詔罔兪危悚無感省循甚熟啟處若驚中謝臣聞人食不浮有邦所慎名器爲假先聖必書是以祿



緣德而爲差賞待勞而作勸君臣之際進退至公切  
念臣科自散材本惟近器當有道之日而抱寧生之  
愚在諸臣之中而專石建之謹遂邀誤寵入幹鴻樞  
大度見容寸長未效三事六府交修之訓亟聞百禮  
千儀法從之榮斯極方虞校議貽損國經敢圖捨爵  
之辰亦預揚庭之告峻升儀等優食邑租且夫器敗  
於盈物衰於盛假令有功可紀尙當遵易退之規况  
其何力于時無容取疾顛之咎敢茲再瀆虔埃曲從  
伏望尊號皇帝陛下體天極之好生法道先之善貸  
保全舊物開可德音儻收已澍之恩是免不濡之刺

同前上皇太后第二表

臣某言近以玷塵褻製虔貢讓函亟辱大言未垂可  
報慮食浮之損國彌夕惕以裝懷罔道有誅更期慝  
懇中謝切念臣芻微衆驗椎鈍自知觀千載以開榮  
蒙二宮之圖舊遂階顯仕或累寸勞未淹緹筦之期  
已正黃樞之署洪惟聖旦務講上儀振萬宗祊之中  
載耜坻場之左而臣屬當景從內愿寡聞動有昆閭  
之迷居無伯始之問睿明垂庇責讓罔加乘此策勳  
例蒙席寵益漢臣之高秩增晉食之爰封所宜拜嘉  
以示殊獎其如道路之論僭莫懲嗟犬馬之懷不能



無感儻自安於異數實取紊於彝倫苟玷大猷靡爲  
細事伏望尊號皇太后陛下詢謀衆采俯諒丹愚協  
議長君賜停前授使器有所極無至於害盈且功在  
不疑何煩於惟重獲依慈貸庶克保全

楊樞密使謝第三表

臣某言再達奏函願還明制猥論已行之命且均寧  
僭之科往愬莫伸冒榮何幸中謝切念臣本微風績  
偶會盛明科自冗閑迭階華要譬之枯木靡自先容  
及乃秋毫罔非帝力遂謹一心之事慎隨異物之遷  
發于誠明期貫夷險至於諸葛應敵臣則闕其所長

方叔有猷臣則慝於未壯樞員承乏機務頗叢屬容  
典之交修顧建明之匪效庶官強力謹爾奉行百度  
森羅居然飭盡實忍慙於無用徒庇質於至明敢冀  
勞還首膺第賞寵階疑峻封字便藩懼受授之兩虛  
控慈威而再瀆冀收成命俯穆大倫寧謂綍靡還絲  
之期爵存屬世之本先加無狀庶勸有庸繫治典之  
化源匪孤臣之私荷寵光下賁震抃參懷斯蓋伏遇  
尊號皇帝陛下普汜翔仁保和樂育業已升於四近  
求無備於一夫特假先榮將權後効敢不退求於已  
罔伏攸箴持守器於易盈靜長柯於有隧竭情夙莫



歸報涓分臣無任

同前謝上皇太后第三表

臣某言昨以玷塵懋賞祈丐還恩伏省陳章既殫於所請枉音催拜遂隔於由衷承命若驚省躬銜感中謝切念臣少緣羈蹇獲對嘉亨出無以蕃扞四方入不足重輕九鼎但以斷斷之介蚤移於忠區區之心所守惟道兩宮察乎少戇三事悉其無邪遂正右樞仰參熙綽朝家累盛禮典懋修或恤祀以展牲或勸耕而育穀親奉至幸法從爲榮曾是憇煩淺爲職業漢庭故事僅且奉行魯廟多儀疲於每問外速瘵官

之謗上貽有國之羞切免是宜褒揚絕望敢謂尊號皇太后陛下慈均不冒利篤廣生因太寢以還衡告外廷而席寵進階近列益戶大邦繼昧死以上言冀課功而責實蓋高莫訴虛授爲慙敢不勵翼謀謨贊襄戴采戒園葵之爭利敦皮弁之守官庶詭微功罔浮厚食誓心有素摩踵爲期臣無任

代人乞存歿臣寮納家集狀

右臣竊周以德之興多文以監二代舜華其協好問而察邇言爰歷古先咸遵風軌期有裨於治體無容廢於警詞輒罄芻蕘仰裨漏闕伏念臣材惟闕茸職



本掃除服君度之在寬不汝瑕而垂采曩者太宗皇帝亮其愚訥獎以寵靈命臣充史館書庫都監兼祕閣供御圖書時屬聖念嚮儒朝猷被世旁求典故備覽清閑又命臣往江浙搜訪遺書真宗皇帝繼體丕承好生善養洗其痕殿秩以冗閑伏遇尊號太后尊號皇帝陛下祇適珍圖交修先憲遺簪未弃塗牖再加又命臣同天章龍圖閣都監臣委質三朝行年八十鍾漏方盡雖愧於夜行塵露有施敢忘於上報臣嘗覽祕書目錄伏覩自唐末至五代其間有以文章取名當世者咸存屬綴列在緹緝載冊府以相輝賁

牙簽而有第我國家承百王之末披三代之英師儒挺生名臣輩出或高文大冊爲廊廟之珍或隱居放言樂山林之志從臣抒嘆太史陳詩炳然斯文高映前代然四部之內編集無聞一王之言規獲安寄使彌文不表則至化弗昭後之視今闕孰爲大臣今欲乞降聖旨下中書取四朝以來存歿臣僚及隱逸之士以文學顯名者各許其人及子孫獻納所著家集乃降下兩制詳定若其深厚溫潤可以垂著不朽者具姓名聞奏官爲給紙墨差人繕寫三本付龍圖天章閣太清樓祕閣收藏足使增觀本朝垂榮來籍開



元之目大備有司之副可求上以見文思安安堯之稽于古下以見賢士濟濟周之所以寧臣之至愚竊爲深惜且年祀寢遠則亡逸滋多今而不求後亦隨廢異日當使陳農訪舊結馳傳之勞河間購遺軫補亡之慮功相遠矣誰曰不然臣衰疾見乘懵昧惟素願留餘景期觀大化之成輕率狂言或俟聖人之擇越干程覽伏待誅夷臣無任

景文宋公集卷第八十四

景文宋公集卷第八十五

表

代薛參政乞致仕上皇帝第一表

臣某言臣聞公器至重多取謂之假人福嚮有涯踰量以之招損然則筋力非便誼許其乞骸鍾漏行休禮容於得謝進退之際終始尤難中謝竊念臣門地本寒材姿無算稟生懦武逮長樸忠慎異物以見遷惟斯文之積習偶此諸生之牒遂代上農之耕出入三朝閒關四紀至乃與聞國議參列禁廬奉屬車之塵法當得從勸華光之講席必爲前接武玉堂之中



美食太官之署稽古垂賜爛其私庭任子推恩徧於  
家姓聯官六卿之重衍食千室之封則假人之譏上  
所悉矣榮願云獲私釁亦鍾賤息天年貳宗乏事蓋  
由臣竊位無補尸祿有初腊毒庭狙不能牢讓蔀家  
瞰室自取降殃則招損之由驗於前矣且臣少也多  
病老而寢加頃緣舐犢之哀頓成鬪蟻之悸足膝痠  
重目瞳眊昏營魂散離強力虧替則乞骸之請臣得  
所宜鄒人迂踈伏生昏忘兩宮之忍致于理二儀之  
務好生剗去浮言儻開纖隙禮居既進恩與其終則  
得謝之文上宜開許伏望尊號皇帝陛下憫孤進之

既耄軫神罰之所加特垂丐於餘辰許上還於所職  
使臣得生歸里閉護視邱墳安車之齡收骨有所茲  
爲悃悞長累聖明伏况七十爲致仕之期九三據重  
剛之厲議年垂及知止在茲儻諧初服於私門是免  
喪元於昭世援天至切得請爲期

同前代上皇太后第一表

臣某言臣聞任重於才官次速乎多謗祿浮於分鬼  
謀害其常盈諒以盛之必衰均朝暮之理亢而招悔  
在進退之交將瀝懦衷敢援茲誼中謝竊念臣稟生  
蔽朴承學陋孤感懷熙辰玷塵清軌自編民而振拔



辱累聖之眷求多識舊章絕希於胡廣少知治體敢望於夷吾尺寸未施寵光益契伏遇尊號皇太后陛下翊長君而在宥統先烈以貫行垂念皤皤之年彌寬事事之責獎其舊物擢預講員在博不勤但欽於躋聖據經而對曷足以名家曼厯歲時寢成尸素窮生有底睿賜無涯嘗於去春啟辭近職退藏散地休息煩言人欲未從天私加勞由冒升於寵等更纏疊於身枝臣有次男素辨家事使治菟裘之業久居汶上之田私闌下衰壯年早世臣病瘵既久悲感見乘結爲憊昏內攻肺腑藐藐孫孺空空室廬薄此遠塗更嬰窮罰安可尙玷承明之祕益重子臧之災罹天薦瘥爲國貽悔願還章綬退老邱樊伏望陛下按得謝之舊規諒知止之深素丐其暮齒許以生歸庶先犬馬之辰不貽溝壑之擠寬髦老於三赦彌服上仁從先故於九原俾無私恨叩闡危苦辭不及文

代參政生日詔書賜牲餼謝表

臣某言伏蒙聖慈以臣生日特降詔書賜臣羊酒米麪者驛使紆駢締封墜眷旅臻錫品紛照家庭銜惠靡貲捫心知愧中謝竊念臣叨陪宰政再貿歲躔庶務所叢淺謀不輯託包荒於天地未賜罷於邱園載



育在辰早孤集感方乃夤緣寵例推衍恩華分碩畜  
於牧人沾美醪於酒正屑麴珍潔導米粢甘榮所自  
生私訂累茵之歛俾于爾艾更蒙全領之慈此蓋伏  
遇尊號皇帝陛下道茂養賢誼深愛禮忘其愚短假  
乃褒優佐家食以屬厭闔宗盟而循省誓勤夙夜歸  
報涓分臣無任感天荷聖激切屏營之至謹奉表稱  
謝以聞

謝加常山郡開國公表

臣某言十月二十二日進奏院遞到勅誥伏蒙聖恩  
授臣常山郡開國公加食邑實封者制出中天恩臨

叢品捫躬匪稱拜命載兢臣某誠榮誠感頓首頓首  
伏念臣才不適時智非周物坐逢熙序厯踐華塗會  
國家追講曠代之遺盛修合食之享孝思上格臣職  
駿奔俯惟守土之拘莫預奉璋之助魂馳龍展愧集  
駑悖敢謂體天法道欽文聰武聖神孝德皇帝陛下  
凱澤一均至仁四被靡間孱陋例霑寵榮進超列爵  
之高益厚加田之目涓塵微効夙無補於聖猷穹壤  
殊私遽併膺於獎典重恩難讓愚悃奚安徒鏤骨以  
自祈庶粉軀而論報臣無任戴天荷聖激切屏營之  
至



代昭文相公乞罷第五表

臣某言伏奉批答以臣累上奏函乞解鈞柄頻煩聞報未賜矜兪事却而心愈危言窮而請彌訥是使天無九臯之達日靡三舍之還內壅孤懷久隔慈聽敢違明命卒布丹愚臣誠憂誠迫頓首頓首臣竊惟操契課功弗效而猶用者不可爲善任竭力奉上已弊而不去者不可爲愛君誠以萬務關諸盛衰四輔本之翼戴統紀一繆誚譟羣興事旣驗前理無冒處伏惟體天法道欽文聰武神聖孝德皇帝陛下鋪明聖職躋塞睿功法周文之能官體漢宣之責實擢臣於

平進委臣以上司七賢歲纏罄效愚欸若乃戎夷儉猾臣當撫鎮也而西有不羈之酋黎庶生聚臣當親附也而內多失職之俗陰陽者臣所變治而精祲之變未除州郡者臣所差擇而嘉靖之風弗競民瘥日薦邦采月賸加以私室生災暮年多病目眩心悸髮禿齒搖哆然一夫隳我三事而陛下雖有善任之德容可獨私老臣雖有愛君之心詎當固位此所以前後四啟本末兩陳亟枉褒言尙欲留輔伏思天意誠有所歸蓋慎始於終則主乎恩退人以禮則示乎漸猗違弗忍孰復見憐然念臣末路徂齡自當必免拙



景文宋公集 五  
謀謬計舉不容誅伏以國事惟微宗工難曠早祈遂  
許令獲退休咨擇辰髦協奮丕績於臣蒙知足之分  
於國表黜幽之宜所執不異前章所干更無它理控  
天自誓觸死弗渝延聽可音庶寧憂慊臣無任翹衷  
疊訴懇倒屏營之至謹五奉表陳乞以聞

樂書局謝賜景祐樂髓新經表

臣等伏蒙聖慈各賜臣等景祐樂髓新經一冊者樂  
教通倫茂昭於廣博常言知選鋪詔於本元藹垂範  
以坦明亟鏤方而流布頒文胥洎拜賜知榮中謝伏  
惟尊號皇帝陛下保合在和慎徽布度凝瑞福於羣

品暢蕭勺於九圍惟時右文式克稽古永言六代之  
制未表五均之微治定在辰財成有屬先比音而立  
法遂稽器而展聲追乃鏗純革其燠殺乘書程之夜  
乙問機緯之日孜孜考前經森條奧訓由子及午辨  
位六同自駟得鶉正名七列討力華之餘韻會祕式  
之經躔案以旋官配乎茲祀推阮隃之管象較上黨  
之黍圍度量惟精金石乃定爰表新書之號俾資廣  
內之傳倬爲章而可瞻不愛道而臨下以聲爲法遂  
該禹律之精甚德何加方邁韶箛之盛臣等俱緣懵  
學叨直禁扃窺述作之模但欣游聖曠太常之誼潛



誓服膺仰陶監代之風倍激丁辰之幸臣等無任

代謝改官表

臣某言月日進奏院遞到官誥勅牒各一道授臣前  
件官仍放朝謝者溝壑仆材久從於病免星闈華選  
尙忝於序升榮寵不貲庭殘萃感臣某

中謝

竊念臣

稟生祐薄繼代門單以一介之陋生服千齡之聖會  
擢從士伍寢被朝猷薦叨共理之良蔑有萬分之報  
貪天善養食土何知而臣自幼纏痾頻年寢劇去夏  
以攝生寡術積損蚤衰卧漳浦而沉緜踰漢科之假  
急移書言狀待報去官旋蒙詔綽之頒俾齒京臺之

籍優其廩俸便居家居內結病悰久淪生意敢謂尊  
號皇帝陛下至仁溥邇橫施豐融謂其犬馬之微常  
佩虎魚之重拖紳中廢忼日未終因久次以推恩獲  
外郎而增秩寵生望表位溢智涯魄已散而復還骨  
將枯而更肉況臣率平強之力尙畏敗官屬影撇之  
餘何勝誤寵戴邱山之重恩遡泉壤以猶生儻幽錄  
之未編期麋軀而上報臣無任戴天荷聖激切屏營  
之至限以官次不獲奔詣闕庭謹奉表稱謝以聞臣  
某頓首頓首謹言

代石少副賀南郊禮畢表



景文宗公集  
臣某言伏覩今月二十八日南郊禮畢者陽郊已事  
邦節有容列位均歡綿區浹慶中謝恭以享帝莫先  
於聖報本莫隆於天有國所修舊章惟允走四海而  
來助聿展多儀閱三年而後行舉無違禮屬當盛際  
昭憲先謀恭惟尊號皇帝陛下天秉粹溫時行剛健  
紹休謨列之懿同底方隅之寧乘時尙文賁雲章於  
天極推懷布惠淪膏澤於民心法令詳平吏治修謹  
遂使休光瑞應同日竝臻式勤讓善之方以飭就陽  
之典相惟羣后鋪究上儀殊庭左廟之嚴前升乎圭  
瓚厚地皇穹之重合薦乎陶匏敷侑席於層坎煬高

煙於紫宙三靈交感百禮具成且復御象闕以嚮明  
稽奮雷而肆眚內策勲乎從衛外疇賞乎方州慶賞  
遂行表裏胥悅臣向叨近侍今退私闕苦盤蹠之不  
仁陪末行而莫逮閑坊就第但聆於穆之餘法從觀  
光莫覲猗那之盛欣愉內積距陌無從臣無任

謝復侍讀學士表

臣某言今月十八日馬遞到官誥勅牒各一通授臣  
依前充翰林侍讀學士仍放朝謝者左符待罪方倣  
常箴中制疏恩遽還近職祓前尤之詿謬艷來寵之  
便蕃撫已銜榮無顏容愧臣某誠感誠抃頓首頓首



景文公集 卷十五  
伏念臣福祚單狹性局憊煩距躍至愚坯陶上教因  
隨士夫之牒謹修官學之方入直文林進簪侍筆從  
雞翔之游豫備虎觀之討論薦許爲邦俄蒙納節序  
濟天掖祇演王縉再忝複門之游久奉華光之學至  
於刪定條約豫法家之議者三年整比京司牧縣官  
之財者萬計止貪云補罔避謗囂仍因謫句之閑嘗  
逮邇言之訪質當今之謂病利靡敢庾情語前世所  
以存亡或蒙稱善以孤遠之質荷顛卬之知播於傳  
聞寧無妬媚何者一金被賞來衆口之毀銷寸的取  
囊企百夫之決拾盛名難處援寡易危况復因希闊  
之儀抵忘誤之禁緣爲飛語遂浼至聰所賴公議原  
情睿慈含垢憫一眚之失義有相除在三赦之科愚  
最無害止停嚴直猶屏大藩曾未半朞亟頒成命舉  
已除之籍復著禁扉慎數易之宜仍留州閤孤心按  
堵蹇步良行此蓋尊號皇帝陛下養以至仁納之大  
度忍令久弃俄與自新冒陳檄以流膏破幽益而逗  
照故綏更飾足追露冕之矜新組交垂遂免寒灰之  
辱况臣素探前代粗識大方謂事君之盡忠不忘干  
犯知獲罪之無禱有係在天水雖折而猶東石可磨  
而弗撓謹當鮮明厥守漭漭爾疵夙夜匪告於勞淄



磷不昧其節河湍日皎有如自誓之言絃勁革柔參服攸聞之戒獲收涓效歸報洪私臣無任

慰皇兄汝南郡王薨表

臣某言得進奏院狀報今月八日皇兄汝南郡王薨謝追封濮王者沴罹棣鄂悼結楓宸置計外聞輿心中怛臣某誠悲誠鯁頓首頓首恭以濮王承華皇籍育德慶源備王禮於三駢首天倫於萬乘表儀朝序友悌宗藩當延磐石之封奄速壞梁之釁伏惟體天法道欽文聰武聖神孝德皇帝陛下義深斯痛情篤孔懷賁泉壤以追榮極典章而恤命恩親茲厚尊寵何加伏蘄理遣深衷道齊達觀割奈何之重愛順有典之常經臣限守藩符阻趨廷陛臣無任瞻天望聖慘惻屏營之至

謝曆日表三道

臣某言伏蒙聖慈賜臣詔書一道并皇祐五年崇天萬年具注曆日一卷者居卿雜候列舍平分定朔啟元繫時訖歲以財成於太史用分授於庶邦臣某

恭惟尊號皇帝陛下惟古與稽前民致用每當故

禋之末豫謹來茲之常迎步龍躔昭集鶉尾舉十二中之位氣以叙來列大小餘之差閏隨月見衍候辟



於卦緯竄襪祥於術家木夏人正兼漢時令騰示繇  
寓守此共規恭聞言天者必驗諸人惟聖能述明時  
者先治于曆俾世弗迷仰誦頒常允謂知本臣叨分  
守瑞豫拜賜書啟簡揆辰按文得候示人以信固無  
穀管之差告朔有經寧懼餼羊之廢誓勤宣布少答  
恩私

謝曆日表二道

今月某日進奏院遞到詔書一道蒙恩賜臣至和三  
年崇天萬年具注曆一卷者官惟底日后以授時迎  
歲前頒綿區同稟臣某誠感誠幸頓首頓首臣聞惟

古治曆求端在天發斂有常舒散來效恭惟尊號皇  
帝陛下作聖於睿與神爲幾每緣班朔之常尤推雜  
候之謹預步盈縮參注襪祥叙分至而著之篇條晦  
茲而舉其正鏤藪流布馳驛分頒卽日行春固厚長  
人之幸異時流火直無司曆之差臣幸守列邦例蒙  
溫詔敢忘紬繹以昧初常

謝曆日表第三道

臣某言今月四日進奏院遞到詔書一道賜臣嘉祐  
五年曆日一軸者堯曆授人舜璣觀運寅敷時訓謹  
示天常叨備守臣幸藏王朔臣某誠惶誠感頓首頓



景文公集 卷八十五  
首恭惟體天法道欽文聰武聖神孝德皇帝陛下撫  
臨函極愛育黎元當四氣之環周重五辰之軌順清  
臺課索黃道推迎間翺忽以靡容正閏餘而率定旁  
探六家之祕中參一歲之宜雜候畢書道占允驗曲  
盡聖神之蘊因知覆幬之心溫詔下頒列藩均被臣  
方司幾輔獲奉王正拜君命以匪違審民時而皆得  
謹當宣布庶使遵明臣無任

謝乾元節表

臣某言伏以帝出紀乎震方聖生符於里社揭爲亨  
會識乃洪休惟丕后克生之辰當正陽幾望之旦萬

靈輸祉九寓祝延臣某誠喜誠抃頓首頓首恭惟體  
天法道欽文聰武聖神孝德皇帝陛下膺赤伏之祥  
据綠圖之會天付所覆罔有不臣世詒厥謀用侈斯  
慶掩刑書以幾措斂威械而就囊物無天傷俗致仁  
壽謝生靡所名德無階是用企電樞之期相與狗露  
囊之典或披藥館或叩金祠括輿地以投誠後璇穹  
而歸老呼韓薦幣跣拔奉珍雖舊而新常茂居安之  
業俾萬斯億永無聖算之期臣久服內聯今乘邊候  
僊君門之萬里隔觴會之九行姑抃昌辰內翹歡素  
臣無任祈天頌聖激切屏營之至



景文宋公集  
賀德音表

臣某言今月二十一日馬遞到德音一道以皇祐六年四月一日爲至和元年臣卽時集官吏將校宣示并行下諸縣訖有食之會善曆前知更始之文上聖無憚緣肇題於年紀用普賚於黎元飛驛疾頒多方朋抃中謝臣聞天所以垂戒者寓乎象君所以應變者本諸誠故禹由罪己以興湯稱旋日而感古有茲事今驗所聞伏惟尊號皇帝陛下挺高世之姿撫下武之運于命之不易惟日之與新以不戰屈屬國之羌以重威纓老上之虜足食而教飭法號平萬務信

釐億姓滋行屬者步太陽之舍在正月之交言數則非有不用行之占語時則固無自取謫之悔陛下推美弗蒞引咎益虔舉徹常饗朝避正寢大肆多眚復著首年發積錢勞三邊之屯閣丹筆降庶獄之死臣伏讀聖詔徧視曩篇雖日主大君時忌孟夏然所次異者厥證從之或分野饑凶或臣下譴負氣兆豫動躔晷昭垂非專一人獨主斯應陛下弗覩災以釋懼弗恃治以忘謙就朔改元因事修政臣又聞神雖在上鑒不遠顏必且畏德還戚轉沴爲祉有因晦不現有當虧而完敢煩有司顯於丕貺臣違去從橐方荷



守戈竊誦恩言愈欽盛際臣無任戴天頌聖激切屏營之至

賀日蝕日降雨表

臣某言臣所治定州并轄下州軍去三月二十九日雲氣晦暗至今月一日五鼓降雨盡酉刻未止及尺以上屬縣告足臣伏尋近降德音以有司豫言朔日日當食有詔避正殿輟膳改元示天下自新引咎太切三靈震動重陰蔽霄日景不見夫不見者與不食同臣某誠喜誠抃頓首頓首伏惟尊號皇帝陛下纂戒四葉憂勞萬方日月祇惕罔有懈忽辰晷回薄大

抵有常今近推變異厚自克責天監在順神佑者謙感無旋且轉祥爲福前此六月不雨麥禾枯悴及茲霈霑遂冀有年天完太陽地茂多稼君道尊安旱災訖息虜使在道親覲感應震畏盛德抑伏奸謀上推古昔今無倫比臣乘邊在遠不獲與羣臣稱慶闕下謹奉表陳賀以聞

慰温成皇后大葬表

臣某言得進奏院狀報十月七日温成皇后大葬禮畢者椒壺上賓梓宮永闕恩厚泉窆慘結邦闡臣某誠哽誠咽頓首頓首恭以温成皇后肖順坤元倪異



天表內輔柔教旁翊鴻機大練有以自修彤管不可  
勝美宜享耄老遽及冥升伏惟體天法道欽文聰武  
聖神孝德皇帝陛下厚眷賢家追正慈極卜建園寢  
近負都城匪急而緩者俾守常經弗奢而儉者以成  
遺志復土斯已納主方初然情與文殫則哀隨日遣  
望申恒悼彌舍粹純僖祝宸嚴飛越心爽臣限總軍  
務不獲奔赴闕庭臣無任瞻天企聖禱係屏營之至  
謹差本州都知兵馬使呂從奉表陳慰以聞臣某誠  
哽誠咽頓首頓首謹言

賀正表

臣某言伏以初建寅辰日纏營室夏正啟序品彙鼎  
新漢殿受圖華夷輻湊臣某誠懽誠抃頓首頓首恭  
惟體天法道欽文聰武聖神孝德皇帝陛下紹統熙  
洽凝神穆清憲泰象以相宜體乾元而邁德民歌舜  
旦世浴堯仁丕丕寶圖衍鴻休而增熾簡簡祕貺乘  
慶序以叢休臣叨奉邦符恪司藩輔頌南山而拜壽  
莫參翔鷺之聯企北闕以馳魂徒鬱疲駑之戀臣無  
任瞻天頌聖激切屏營之至

謝轉左丞表

臣某言三月十八日進奏院遞到官誥勅牒各一道



景文宋公集 卷五十五  
以臣同修唐書成除臣尙書左丞依前充端明殿翰林侍讀龍圖閣等學士集賢殿修撰尋具奏陳讓今月八日奉答詔不允者冒榮而受撫已增慙臣某誠榮誠感頓首頓首伏念臣曩與諸儒共刊舊典麤使在外裒藁自隨十有七年書乃絕筆伏蒙尊號皇帝陛下弗責其緩止錄所勤外嘉終篇例詔增秩臣實無狀輒用固辭而成命已行如汗不返衆力相藉孤讓難從永惟劇司是號中轄臣敢不以瘁補拙勉懦爲強一得一酬九殞無憚臣無任戴天荷聖激切屏營之至

代石太尉謝令安州照管表

臣某言八月日安州進奏院遞到中書劄子奉聖旨已令本州常切照管者寬大之命下濟於天光燄赫之軀甫還於筮魄發鼓若輝於龍燭釋憂如出於虎蹊撫纘息以幸存奉絲言而增惕臣某誠榮誠抃頓首頓首竊念臣本惟儔昧獲邁會昌乏千里之折衝懵四夷之方略程材六郡獲預於良家待罪伍符詎知於尺籍先帝軫其單賤勗以勤劬靡試弁於外庭遽編名於衛署宣威亭鄣屢分四牡之華弭亂巴賚曾豫一夫之勇未能陳力深懼曠官伏值皇帝陛下



蒼震承休珍圖纂業將懋功而致賞方右武以勸能  
俄辱寵章薦膺渥洽乘輅出使茂施橫草之功飲至  
勞旋濫豫策勲之爵自爾奉簡書而祇畏飭師律以  
申嚴克完犀利之兵上副穆清之寄累勞未驗乃眷  
益隆尋復盜起坤維妖興玉壘吳蛇薦食竊弄於庫  
兵泮樞未懷敢稽於天討而臣謬當深詔躬佐下軍  
受堂上之奇謀制日中之醜虜帝赫斯怒貔貅方議  
於奮威人得而誅蟣蝨已聞於相吊天聲大震月捷  
繼聞俄申戮於凶渠俾惟新於汙俗集成巨伐皆稟  
睿謨若專微臣幾誤大事乃至邊陲屢警戎索載嚴

塵兵老上之庭斬級雲中之塞宸旌直指殄幡豕之  
星狼革輅親征見漢家之武節分屯爪士防遏盛秋  
臣實妄庸獲膺任使敢不深惟一得之慮載施十駕  
之勤備重耳之艱難謹武侯之節制被堅執銳志竭  
於寸長斬將搃旗誓當於一隊旋屬穹廬納款左衽  
通歡兜零罷照於邊烽督元邁歸於內地肇建和戎  
之策茂臻偃伯之期遂復第賞靈臺疇庸盟府當陽  
三接屢榮錫馬之侯列國十連遽杖齋壇之鉞繼頒  
成命出領大藩而不能恪奉詔條勤修職業畔官雜  
局妄肆於矢言殄行震師果罹於昭憲既具王庭之



獄請從蕭斧之誅豈謂天意好生皇明獨斷屈成刑  
之端議申肆眚之大猷止外竄於遐圻俾俯存於餘  
喘念一介之賤不忍加誅廓三面之羅與之更始洪  
推大賚曠絕常均此際仰舜法之大寬荷堯仁之不  
殺挺身萬里甘淪禦魅之區齋志九泉用塞喪元之  
責未周成歲尋霈鴻私自臨賀之炎陬徙房陵之內  
郡假青宮之道候給長府之廩錢擢于鉗鈇之中齒  
乃衣纓之列弃簪之賤特軫於上仁涸轍之波彌涵  
於麗澤仰繫大度克庇微生敢期再歲之間復降自  
天之命改陞環衛徙置方州蟠朽迴春頓茂九陽之

氣幽潛發蟄驟驚百里之音夫何流宥之餘獲覩光  
華之旦斯蓋陛下阜昌景化丕闡寶慈以臣久在戎  
行屢持師節管宄之見雖無前筮之勤犬馬之勞不  
捨弊帷之報特形隆旨昭示守臣俾自勵於操修且  
深加於存卹不寒之慄潛釋於冰淵垂暮之年免墜  
於溝壑事踰初願恩極更生再念臣抱釁已來撫窮  
至熟誠由爵位太厚尸曠居多失漢臣醑謹之風冒  
道家干進之忌寇至誰咎器滿則傾果貽折覆之凶  
上玷清寧之化然而事君無隱靡有於戈腸食肉寡  
謀薦招於祇悔由物情之靡協致陰譴以自貽每念



景文宋公集  
前辜敢忘終食謹當上遵彝訓克勵迺誠用酬觀過  
之私循致寡尤之地屬桑榆之日索懼螻蟻之命輕  
雖貪祿鶴軒深貸百緡之贖而裹尸馬革愈堅十死  
之心臣限以拘留不獲躬詣闕庭臣某無任戴天荷  
聖激切屏營之至謹奉表稱謝以聞臣誠榮誠抃頓  
首頓首謹言

代謝加朝請大夫表

臣某言今月十三日進奏院遞到官誥一道勅牒一  
道蒙恩加臣朝請大夫護軍餘如故仍放朝謝者緣  
函濡澤方均在宥之仁紫素裁書遽被策之勲典祇

荷若驚之寵深懷不克之憂臣某誠榮誠抃頓首頓  
首竊以周命庶官第九儀而詔爵唐徵異數由十二  
以進階所以褒職業於宗工辨等威於朝著官無速  
謗乃堂陛之克崇名或假人實負乘之可畏如臣者  
凝猷素寡治行無聞臨遣大庭茂著惟良之譽奉揚  
寬詔頗淹報政之期屬以標燎告虔星雞肆眚給薪  
札十行之旨兼散官五品之榮天何蕞蒨之材亦被  
厖鴻之賜穎川加秩誠有謝於褒揚宋鼎益恭誓無  
忘於俯僂庶勵夙宵之志用酬覆幬之私



代謝加勲表  
臣某言今月日本州進奏院遞到官誥一通勅牒一道蒙恩加臣上騎都尉餘如故仍放朝謝者神壇三襲肅陳天燎之儀溫詔十行誕布玉絲之澤渙汗式均於近著策勲爰及於具寮對昊命以知榮循官箴而增惕中謝竊以真行之寵遠自於周班疏爵之勲近從於唐制皆以增隆命數徽序國章慎庸服以疇勞縻寶賢而分職事常享會必副輿僉如臣者尤治無聞曠僚滋久超石牆而展案貳符守以出藩徒堅斷斷之心未洽優優之政幸屬國家撫重雍之景運

展甚盛之帝容卽大次以告成御瑁輿而飲至天闈第賞允示於推仁侯服均禧誤叨於進律顧光華之曲被實俯僂以無從謬玷寵靈彌喧物議敢不劬勤職業率勵典彝夙夜在公謹守舜兪之訓彌縫其闕免招漢冒之譏

代上皇太后謝出外表

霈發旻天澤流巖槁內循亨會罔寘情涯中謝竊念臣一介孤生兩朝誤寵無裨王度有玷官成再躋架浪之居繼掌隨風之命司馬素遲之思動或淹時倚相能讀之書老而彌忘且以稟生多病仍歲弗支匪



景文公集 三  
服成災瘵官在慮乘霜露之邪隙動冰炭之夙痾結  
爲沈繇損其強力臣亦上體洪造思致小康經熊鳥  
以養和觀龜頤而考吉移書請告沓委於攸司瞑藥  
攻中寢成於淹卧迭陳囊啟求假郡麾危心苦言援  
天非一至仁大度藏疾已多賴祝網之在寬輒竄漳  
而終請豈謂伏蒙尊號皇太后陛下蓋高垂聽善貸  
均慈恕及愬愚罄無底裏許中停於辭禁更推進於  
官聯寶構清司使符重寄併爲烜赫垂逮疋殘矧惟  
此邦臣之舊治周知風土之樂具存條教之規庶盡  
力於朞年埃有痊於癘瘵復瞻丕幸仰謝大恩勉於

未死之前奉乃彌文之化私悰所誓淪髓同深

原本此下

伏



